

Re' huj xtz'ihmjic chi queh comonil niminel quik'oric pan Hewreyo

Re' Dios xitak'a' cho i rAc'un chi rik'ormojic keh riC'uhbal

1 ¹Chiwach take cho k'ij naxic'acharic take cho kamam kati't, re' Dios q'uih wo' take raj k'orol ric'uhbal xitak'a' take cho c'uc'. Ma xa ta junpech xk'ormojic queh c'uhbal, q'uih la' pech eh ruc' ju'jun pech xk'ormojic cho queh, rehreh wach rik'ormojic xbanaric cho queh. ²Raj yu'na chipam take ricux'ic wach take k'ij wilcoj wj' wili, re' Dios xitak'a' cho i rAc'un kuc' i hoj ra' ri'sil cho ma' Israhel reh chi re' chic re' narik'oric keh riC'uhbal.

Nok ma' ja'xta nak bih wilic wach ac'al on ar pan taxaj, re' Ac'unbes re're', re' aj wo' re' xipahba' i Dios chi aj tik'inel reh chi'nchel wilic ayu' wach ac'al ch'il wilic ar pan taxaj. Je' wo' xipahba' chi Ajabes china chi'nchel nic' pa' nimal tik'imaj cho ru'um. ³Je' wo' chic, re' Ac'unbes re're' sutumaj wo' rij ruc' riholonquilal wach sakom sutumaj wj' rij i Dios eh ruc' re're' nc'utunic wo' chi manlic nic' wach riwi' i Dios. Re're' k'e' wo' rajawric rik'orbal wilic chi quina take nic' pa' nimal wilic ayu' wach ac'al ch'il wo' take wilqueb ar pan taxaj. Je' re' riwi' maj narik'or queh chi naquitikim ju' wih'ic je' ricab quitik'injic banoj, quicahnic wo' chi je' re' quiwi' eh je' wo' ma' niq'uic ta wach chaj bih nquicamanej.

Jenaj chic k'oric enik'or chirij rAc'un i Dios. Re're' nok ric'ulum chic ti'c'axic chikij i hoj chi ricuyuric kamahc, xc'amaric johtok pan taxaj eh ar xye'eric wo' reh jenaj wach lok'il ch'il i Dios je' ricab nanye'eric rilok'il jeno' c'acharel nantz'uhkic cok chi richel jeno' k'atal k'oric. ⁴Re' rilok'il xic'ul re're', k'e' wo' chic rinimal wach chiwach i ye'oj queh take raj tz'e' wach i Dios. Je' re' nik'or ru'um chi re' lok' laj k'oric k'oroj chirij rAc'un i Dios, k'e' wo' chic lok' chiwach i k'oric k'oroj chiquij take raj tz'e' wach ar pan taxaj.

Re' rilok'il rac'ün i Dios

⁵Chipam i lok' laj huj re' wilic wi' riC'uhbal i Dios nkilow chi re' Dios je' wili xik'or reh rAc'ün:

“Re' hat, hat wac'ün.

Chiwach i k'ij wili tinipahba' yu'na chi k'atal k'oric, nqui reh. Pan junk'at chic reh Lok' laj Huj re're', re' Dios je' wili rik'orom cho:

“Re' hin xa wilquïn wo' cho chi hin awajaw

eh re' hat xa wilcat wo' cho chi wac'ün, nqui reh.

Re' take k'oric wili ma' janc'al ta k'ij rik'orom cho Dios chirij jeno' raj tz'e' wach.

⁶Je' wo' chic, ar chipam i lok' laj huj re're' nkilow i k'oric xik'or cho i Dios chirij i xa jenaj chi rAc'ün re' wilic rajawric chi quina chi'nchel. Je' wili xik'or nok q'uisin ma' chic ritak'a' cho ayu' wach ac'al:

“Re' chi'nchel take waj tz'e' wach quiyew rilok'il ru', nqui xik'or.

⁷Ar wo' chipam i lok' laj huj re're' nok xk'oric i Dios chiquij take raj tz'e' wach je' wili rik'orom cho:

“Re' take waj tz'e' wach re' wilqueb chi ribanaric nicamaj,

xnitik'a' take chi xa nic' yu' enijal quiwi' je' ricab nc'uluric ruc' i tew chi xa haj pa' eriban chi ricora' je,

on je' ricab i k'ak' chi xa rupuj rib i xak, nqui xik'or cahnok.

⁸Raj la' naxk'oric cho ruc' rAc'ün, je' wili tz'ihmbimaj chi xik'or reh:

“Re' hat re' wilcat wo' chi hat Dios chi junelic k'ij sakom,

wilic awajawric chi k'atoj k'oric eh ma' haj ta ticalajic nech' ok ruc' i k'atoj k'oric na'n.

⁹Je' wo', k'e' nponic chawach chi naribanaric i coric wach no'jbal, raj i c'ahbil laj no'jbal ch'i'c nawilow.

Je' wo' chic, je' ricab nanchihiric wach i c'acharel noquic chi k'atal k'oric cu nbuch'uric i wach na ruc' nc'ohnic laj ik'om,

je' wo' re' xniban aweh i hin Dios, xatnichih wo' chi quixilac take awich k'atal k'oric

eh xniyew aweh jenaj nim laj sukquil c'uxlis ma' jaruj ta c'uhlel wach, nqui xik'or.

¹⁰Je' wo' chic chipam i lok' laj huj re're', tz'ihmbimaj wo' cho chi re' Dios je' wili xik'or reh rAc'ün:

Re' hat Ajabes, re' hat xat-tik'inic reh wach ac'al je' wo' i taxaj.

Hat xat-tik'inic cho queh re're' nok ja' np'uhtic ta cho i c'acharic ayu' wach ac'al.

¹¹Re' hat xa wilcat wo' cho eh xa nawih'ic wo' chi junelic k'ij sakom.

Raj i wach ac'al ch'il i taxaj, re' take re' xa narisahchic wo' quiwach.

Je' ricab nsahchic wach take tz'ih quik'eherbic, je' wo' re' narisahchic quiwach take re'.

12 Je' ricab nc'uluric ruc' i c'acharel chi narijal riso' chi pa reh chic riroj chirij naresaj lok i jenaj chic, je' wo' re' naric'uluric ruc' taxaj ac'al chi narijahlic wo' wach. Raj i hat xa awi' wo' nacahnic eh re' rik'ijil ac'acharic ma' jaruj ta c'uhlel wach, nqui Dios.

13 Je' wo' chic, ma' janc'al ta k'ij rik'orom cho Dios chiquij take raj tz'e' wach re' rik'orom cho chirij i rAc'un chi je' wili:

“Je' ricab naric'ul rilok'il jeno' c'acharel chi ntz'ukunjic cok chi richel jeno' k'atal k'oric, je' aj wo' re' nachac'ul alok'il wili i hat: Re' hat nawih'ic chinichel cu rehtal nawilow chi re' take awaj ixowonel

naquiwih'ic ri'sil awok, nqui rik'orom cho chirij.

14 Re' Dios ma' janc'al ta k'ij xik'or cho chi je' re' queh raj tz'e' wach maj re' take raj tz'e' wach xa uxlabal take, xa wilqueb wo' chi ribanaric i camanic ye'oj queh ru'um i Dios eh re' quicamaj ye'oj cho re're', reh chi naquito'bem take aj nimenel re' naquehtric chi naquico'ljic chiwach i ti'c'axic nariye'eric chi tojbal wach quimahc take aj mahc.

Kayew tak kac'ux chi rinimjic take k'oric xic'am cho rAc'un i Dios

2 1 Ru'um aj chi xkabiraj chic chi re' rAc'un i Dios k'e' wo' chic nimal rilok'il wilic, curman wo' chi keh chi rima chic nakatikim ju' riye'eric kac'ux chi rinimjic take c'uhbal k'oroj keh. Je' re' ka'n tak reh chi ma' eta nkacana' rich'iquinjic kac'ux chirij take c'uhbal re're'. 2 Je' re' nik'or maj wi ma' je' re' nka'n nakac'ulum keh je' ricab xquic'ul cho take kamam kati't najtir k'ij. Re' take re' ximahcanic nok ma' xquinimej ta take tak'anic wilic riwa'ric chi quina, re' xitak'a' cho rik'ormojic i Dios cuc' take raj tz'e' wach eh ru'um re' xchalic chi quina i ti'c'axic re' til ric'ul chi queh. 3 Je' ricab xquic'ul ru', re' ta wo' na chic i hoj ekojco'ljic chiwach ti'c'axic re're', wi ma' xkayew rilok'il rinimal wach camanic xiban i rAc'un i Dios chikij i hoj chi kaco'ljic chiwach i ti'c'axic narichalic nak chi kana ru'um reh kamahc? Re' camanic re're', pet xik'or ribiral i Ajabes Jesus naxc'ulic ayu' wach ac'al. Chirij chic ru', re' chic take kich aj nimenel re' xibirinic reh xik'or i Jesus, re' chic take re' xquiyew quichi' chi rik'ormojic keh ricorquial. 4 Reh chi nakacojom wach chi coric nquik'or take kich aj nimenel re' c'ahchi' quiyeb quichi', re' Dios xiban q'uihlel wach take sachbal c'uxlis chi quiwach take tinamit rehtalil chi ricorquil i c'ahchi' quik'orom. Ma' xa ruc' ta re' xc'utunic chi coric nquik'or, xc'utunic la' wo' ruc' ribanaric haj wilic xaj i Dios chi je' wili: Chi re' take kich aj nimenel xye'eric queh i Lok' laj Uxlabal reh chi q'uihlel wach take ricamaj i Dios naca'nam.

**Xa re' wach i kAjaw Jesus xye'eric rajawric
chi k'atoj k'oric chi quina chi'nchel**

⁵Xink'oric chic chirij chi re' lok'il ye'oj queh take raj tz'e' wach i Dios ma' nponic ta ruc' je' ricab lok'il ye'oj reh i rAc'un i Dios. Yu'na tocom chic riwi' k'atoj k'oric chalic reh ayu' wach ac'al eh ma' re' ta take raj tz'e' wach i Dios ye'oj cajawric chi ribanaric i k'atoj k'oric re're', ⁶re' la' i hoj xiyew kajawric chi naka'nam k'atoj k'oric re're'. Chipam Lok' laj Huj wilic wi' riC'uhbal i Dios tz'ihmbimaj chi je' wili:

“Re' hat Dios, xa chirij wo' katobjic i hoj tinamit ticapewenic eh chi katobjic i hoj c'acharel xatchalic i hat, tob ta ma'xta ti kawa'ric.

⁷Je' re' nik'or maj re' hat xa'n chi re' quiwa'ric take awaj tz'e' wach xic' wo' chic na chiwach kawa'ric hoj c'acharel.

Xa re' la' tob ta wo' je' re', re' hat xayew kalok'il, xayew wo' kajawric je' ricab jeno' aj k'atal k'oric.

Chi je' re' ajic, chi kana i hoj xacana' rilmijic chi'nchel i nic' pa' nimal atik'ab take cho.

⁸Chi quina chi'nchel re're' xoj-acoj chi hoj k'atal k'oric, nqui tz'ihmbimaj cho.

Ruc' k'oroj cho re're' nrakmajic chirij chi re' Dios xiyew keh hoj c'acharel chi xwih'ic kajawric chi quina chi'nchel ritik'inic cho ru', tob ta yu'na ja' nilmijic ta wach chi'nchel chaj bih oconak chic chi rehquen kajawric i hoj. ⁹Re' cok ru' nkarak chirij i no'jbal re're' ruc' xkilow wili chi xc'uluric ruc' i kAjaw Jesus: Nok re' Dios xiban chi xkajic wach junc'am ok riwa'ric chi quiwach take raj tz'e' wach, xiban wo' chi xcansjic i Jesus pan kajelow-bal i hoj c'acharel. Je' re' xiban ru'um reh rinimal wach richak'lamil chi kana, reh chi je' re' ma'xta kacahnic chi hoj camnak chi junpech. Re' cok ru' chirij chi camnak chic i Jesus, xiban wo' chi xic'ul rinimal wach rilok'il eh je' wo' rinimal wach rajawric naxsoljic wo' chic johtok ar pan taxaj.

¹⁰Ruc' wili nkilow chi re' Dios re' aj re' xtik'inic reh chi'nchel eh chi re' chi'nchel i nic' pa' nimal tik'imaj cho ru'um, wilqueb wo' ru'um reh riwa'ric wilic. Ma' xa ta re're', xitik'a' la' wo' cho wach chi re' Jesus xic'ul i ti'c'axic reh chi je' re' xcahnic chi re're' i c'amol beh re' nari'c'uhntunic queh c'acharel nic' wach naquico'ljok chiwach i ti'c'axic nchalic ru'um i mahc. Je' re' xiban ru'um raj chi q'uih take rac'un rixk'un naquehtric wih'ic chipam ye'ab re' wilic wi' i Dios chi sutumaj rij pan holohic laj sakom. ¹¹Re' xiban i Dios k'e' wo' chic tarej maj ma' xa re' ta Jesus re' nc'ambic quibeh take aj niminal wilic chi rac'un, je' la' wo' re' take aj niminal c'amoj quibeh ru'um i Jesus wilqueb wo' chi rac'un rixk'un eh ru'um aj re', re' Jesus ma' nq'ui'x'ic ta chi kacojoric chi hoj ras richak'. ¹²Re' wili nc'utunic chipam Lok' laj Huj re' wilqueb wi' i moloj wach bich lok'onbal reh Dios narik'or chi je' wili:

“K-Ajaw Dios re' hin nanik'orom ribiral abihnal queh take was nichak' eh nok kamolom kib chi rilok'onjic awach,

re' hin ch'iḷ take was nichak' nacat wo' kalok'em ruc' take kabich, nqui rik'or.

¹³Chipam wo' Lok' laj Huj, re' Jesus rik'or wo' chic chi je' wili:

“Re' hin nanich'icab nic'ux chirij i Dios, nqui rik'or.

Je' wo' rik'or wo' chic chi je' wili:

“Ayu' wilquin ch'iḷ take xicoj i Dios chi rac'un rixk'un.

Re're' xiban wo' chi wilqueb chi aj nimem take win chi ribanaric haj wilic i raj ru'.

Chi quina take re' k'uru' xiban chi wilquin chi k'atal k'oric, nqui xik'or.

¹⁴Je' aj re' ru' chi cojoj chic chi Ajabes chi kana chi'nchel i hoj aj niminel, re' Jesus xasjic wo' je' ricab kawī' i hoj, chi xa quic' tiwic wo' ti nye'bic ric'acharic kati'jolar kabakil. Chi je' re' naxiyew rib chi quimic, xik'et wach riwa'ric aj Yahm maj xisach wach rajawric wilic nak chi kacansjic. ¹⁵Je' ricab nok jeno' ajabes wilic rajawric chi junpech china jeno' raj camanom, je' wo' nak re' wilic rajawric aj Yahm chi kana hoj chi junpech nakojoyo'jic chiwach i quimic xa re' la' re' Jesus xisach wach ajawric re're'. Ruc' xiban re're' xelic i yo'jic wilic nak pan kamna je' ricab nanteh rij jeno' camanom pan k'ab jeno' ajabes re' wilic nak rajawric china chi junpech.

¹⁶Re' chi'nchel xiban i Jesus nkilow chi ma' re' ta chiquij take raj tz'e' wach i Dios xiban chi to'bal queh, chikij la' hoj ra' ri'sil cho ma' Awraham xiban re're' chi katobjic. ¹⁷Ru'um chi curman chi keh i katobjic i hoj, curman wo' chi re' Jesus xasjic eh xc'acharic je' ricab i hoj c'acharel. Je' re' nik'or maj xa chi je' re' xirak pam i no'jbal re' curman chi nariwih'ic ruc' chi nahsil c'amol quibeh take aj k'ahsem si chiwach i Dios. Ruc' rino'jbal re're' xinimej chi manlic i ricamaj chiwach i Dios, xiquetelej quiwach take aj mahc eh xik'ahsaj wo' rib pan quimic chi cuybal kamahc i hoj. ¹⁸Je' re' k'uru' re' Jesus xasjic eh xc'acharic je' ricab kawī' i hoj. Xic'raj reh ti'c'axic eh xpajaric wo' ru'um aj Yahm. Ru'um chi reht'alim reh chi'nchel ti'c'axic nkac'ul, eriban chi ruc' rimal rajawric erito'bej wo' take aj niminel nchalic pajaric chi quina ru'um aj Yahm eh je' wo' re' riban cuc' take nquic'ul ti'c'axic pan quic'acharic.

Re' rilok'il i Jesus k'e' wo' chic xic' na chiwach rilok'il i Moyses

3 ¹Was tak nichak' aj niminel, re' richihim cho awach tak i Dios chi hat-tak ritinamit eh chi hat wo' tak yuk'umaj chi pan jenaj k'ij etiwih'ic tak ruc' ar pan taxaj, nipahkaj aweh tak chi chayew acapew-bal tak chi rirakmajic chirij chi manlic i k'oroj aweh tak wili chirij i Jesus chi re're' i Pahbamaj chi K'atal K'oric eh chi re're' xtak'abjic cho ru'um i Dios chi banol reh camanic chi Nahsil C'amol quibeh take aj K'ahsem Si chiwach. ²Je' re' ru' rilok'il ricamaj i Jesus ru'um chi re're' riyew ric'ux chi

rinimjic i Dios je' ricab naxiban cho Moyses naxcamanic chi manlic chiquij take tinamit re' xic'am quibeh. Je' wo', re' Jesus xinimej wo' chi manlic i camanic ye'oj reh ru'um i Dios chi c'amol beh. ³Tob ta jenaj wach rinimjic quicamaj xca'n, re' Jesus k'e' wo' chic nim rilok'il chiwach i lok'il ye'oj reh Moyses. Re' no'jbal willi nsakombic wach ruc' i tik'inic pat nbanaric. Nantik'injic jeno' pat, ma' re' ta nchel i pat wilic rilok'il re' la' aj tik'inel reh. ⁴Je' ricab chi chi'nchel take pat cu tik'imaj take ru'um i winak, je' wo' re' take chi'nchel nic' pa' nimal wilic, re' wo' Dios xtik'inic take reh. ⁵Je' aj re' ru' re' rilok'il quic'acharic i Moyses ch'il i Jesus riban jenaj wach. Nik'or chi je' re' maj re' Moyses til coric xcamanic cho chi manlic chiquij take tinamit xic'am quibeh eh re' ribiral ricamaj xiban xcahnich chi jenaj tijbal. Ru'um aj re' yu'na xa cu kojok'oric wo' chirij i Moyses eh je' re' nbanaric maj xwih'ic cho chi je' ricab jenaj holohic laj aj camanom pan jeno' pat. ⁶Je' aj wo' re' xiban i Jesus re' chihoj wach chi K'atal K'oric, til manlic laj aj camanom wo' nok wilic. Re' cok ru' ma' xa je' ta ricab jeno' aj camanom pan jeno' pat nok wilic, til wilic la' rajawric chi quina ritinamit i Dios ru'um nok re're' til rAc'un i Dios nok wilic. Je' re' k'uru' wih'ok ta nak rajawric i Jesus chi kana chi'nchel i hoj aj niminel eh je' re' nik'or maj re' hoj, hoj ritinamit i Dios nok wilcoj. Re' nari'utunic w' chi hoj ritinamit i Dios, re' chi cu yu'na chi k'ij wilcoj chi cow kac'ux chirij i Jesus eh nakatikim ju' chi je' re' cu rehtal cohlsbal wach kac'acharic ayu' wach ac'al. Je' wo' chic, c'ahchi' ok kuy'em richalic i Jesus chi ch'iclic kac'ux chirij ric'ulic lok eh chi ma'xta kayo'jic chi riy'e'eric kachi' chirij.

Ma' nbanjic i k'ihtinic ib chiwach rik'orbal i Dios

⁷Ru'um chi hoj chic ritinamit i Dios, kanimej tak rik'orom i Lok' laj Uxlalab chipam Lok' laj Huj wilic w' ric'uhbal i Dios, re' rik'or chi je' wili:

“Re' Dios je' wili rik'or aweh hat-tak ra' ri'sil cho ma' Israhel:

‘Wi re' hat-tak c'ahchi' abiram tak yu'na re' k'oroj cho wu'um,

- ⁸ ma' nwaj ta chi enacowsaj awamna tak chi niwach je' ricab xca'n cho amam awati't tak najtir cho k'ij naxibehic cho pan ye'ab chik yuk' re' ma'xta w' patanel.

Re' take re' xa xcaj nak chic quilom wi til coric wo' chi naniyeb i ti'c'axic nik'orom cho ribiral chi narichalic chi quina take ma' quinimic ta win

eh ru'um re' xquik'ihtaj quib chiwach i k'oroj queh wu'um.

- ⁹ Ma' xa ta junpech xca'n chi je' re'. Tob ta nak nchel chiwach ca'winak (40) hab xquilow ruc' nak' quiwach take sachbal c'uxlis xniban chi quitobjic, re' take amam awati't tak xa elic wo' xcaj quilom wi til coric chi naniyeb ti'c'axic re' nik'orom cho ribiral chi naniyeb chi quina take nquik'ihtaj quib chiwach i k'oroj wu'um.

- 10 Ru'um aj re' ru' xchalic nic'a chi quina amam awati't tak nok je' wili xnik'or pa nic'ux:
 Re' take tinamit wili ma' ch'iclic ta quic'ux chiwij, ru'um re' xa ma' nquinimej ta wo' haj wilic i nik'or queh, quinqi pa nic'ux.
- 11 Nok chalanak chic nic'a chi coric, xnipahba' nik'orbal chi je' wili:
 Til coric nik'or chi re' take tinamit wili ma' jaruj naquirakam quihil'bal wuc', quinqi, nqui Dios, nqui Lok' laj Uxlabal.

¹²Was tak nichak' wich aj nminel, xabiraj tak chic i k'oroj cho re're' ru'um Lok' laj Uxlabal. Yu'na k'uru' chayohbalej wo' awib tak, ma' nchel nwh'ic jeno' chaxilac tak je' ruc' ma' holohic ta wach rino'jbal eh ru'um chi je' re' rino'jbal ma' ritik ta ju' rich'iquinjic ric'ux chi coric chirij i Dios. Re' jeno' aj nminel je' re' nbanic, jenaj aj chi re' nachicana' wo' chi junpech rilok'onjic wach i Dios re' aj ye'ol c'acharic.

¹³Reh chi ma' eta nwh'ic jeno' chaxilac tak je' ruc' ma' holohic ta wach rino'jbal, macana' tak rik'ormojic take k'oric re' quito'bonic chi ribanaric i holohic laj no'jbal. Elic ok cha'n tak chi je' re' chawach tak cu rehtal ricux'ic wach ac'acharic tak. Chi je' re' ma' hab ta wach aweh tak eriyoj ricapew-bal chi ewo' chic nsoljic je chi ribanaric i mahc eh ma' eta chic ricoj wach i coric laj tijinic chi junpech. ¹⁴Ru'um aj re' macana' tak rik'ormojic take k'oric re' quito'bonic chi ribanaric i holohic laj no'jbal. Je' re' nik'or maj wi cu rehtal ricux'ic wach kac'acharic xa elic wo' c'ahchi' kach'icab kac'ux chirij take k'oric kacojom cho wach cu pan p'utbal cho reh kaniminic, re' Jesus nacoj ricojom chi hoj rich aj c'ulul reh nic' pa' nimal ric'ulum chi Pahbamaj chi K'atal K'oric. ¹⁵Je' re' k'uru' kacoj tak rehtal i k'oroj cho wili ru'um i Lok' laj Uxlabal chipam i Lok' laj Huj wilic wi' riC'uhbal i Dios:

“Re' Dios je' wili rik'or aweh hat-tak ra' ri'sil cho ma' Israhel:

‘Wi re' hat-tak c'ahchi' abiram tak yu'na re' c'ahchi' nik'orom wili, macowsaj awamna tak chi ribirmijic je' ricab xca'n cho amam awati't tak najtir k'ij pan ye'ab chik yuk' re' ma'xta wi' patanel nok re' take re' xquik'iehtaj quib chiwach i k'oroj cho wu'um, nqui Dios, nqui k'oroj cho ru'um i Lok' laj Uxlabal.

¹⁶Hab wach aj chirij nk'oric i Lok' laj Uxlabal naxik'or chi tob ta nak quibiram cho k'oroj ru'um i Dios xa xquik'iehtaj wo' quib chiwach? Xk'oric cho chiquij take kamam kati't je' ruc' xc'amaric cho quibeh ru'um i Moyses naxi'elic cho pan tinamit Ejipto. ¹⁷Hab wach aj china xwh'ic ric'a i Dios chiwach ca'winak (40) hab ar pan chik yuk'? Chi quina wo' take kamam kati't je' ruc' ximahcanic cho chiwach i Dios eh ru'um chi je' re' xca'n, xiquimibic ar pan chik yuk', xha'bic quiti'ljal chipam yuk' q'uixcab re're'. ¹⁸Je' wo', hab wach aj chirij xik'or i Dios chi wilic jenaj juntuhm reh c'acharel re' ma' jaruj ta naquirakam quihil'bal ruc'? Re' take k'oric re're' xk'ormojic chiquij take kamam kati't je' ruc' ma' xquic'am ta na i k'oroj cho ru'um i Dios. ¹⁹Ru'um chi ma' xquich'ica' ta wo' quic'ux chirij i k'oroj cho ribiral queh ru'um i Dios, nkilow chi re' take re' ma'

xca'n ta wo' canar oquic chipam ye'ab re' k'oroj cho ribiral queh ru'um i Dios chi nariyeb nak queh.

Mabán aweh tak i no'jbal je' ricab xca'n cho take kamam kati't

4 ¹Chi je' aj re' k'uru', chi xkabiraj chic chi re' take kamam kati't ma' xi'oquic ta wo' chipam i ye'ab k'oroj cho ribiral queh ru'um i Dios, yu'na re' wo' chic re' rik'or ribiral keh chi ar ruc' nakarakam kahi'lbai chi junpech eh ru'um aj re' curman wo' chi kayohbalej tak kib, ma' ok nchel riban chi jeno' keh ma' eta riban canar oquic chipam i hi'lbai rik'or ribiral keh i Dios. ²Chacoj tak rehtal i nanik'orom wili: Re' take kamam kati't k'ormojic wo' ribiral queh ru'um i Dios chi nariye'eric nak queh i ye'ab re' naquih'lic nak wi', xa re' la' ru' xa ma'xta wo' bih xicamanej queh maj ma' xquich'ica' ta quic'ux chirij chaj bih xk'ormojic queh. Je' wo' re' hoj yu'na, c'ahchi' wo' rik'ormojic ribiral keh chi ruc' i Dios enkarak kahi'lbai chi junpech, ³xa re' la' keh hoj re' cow nkeyew kac'ux chi rinimjic i Dios til ch'iclic kac'ux chirij i ricorquilal re're' chi nakarakam kahi'lbai ar ruc'. Raj take cho kamam kati't ma' xquirak ta quihi'lbai eh ru'um re', re' Dios je' wili rik'orom cho:

“Nok hin chic josk'onak chi coric, xnipahba' nik'orbal chi je' wili nanik'orom:

Til coric, re' take tinamit wili ma' jaruj naquirakam quihi'lbai wuc', nqui rik'orom cho.

Je' re' ajic re' take kamam kati't ma' xi'oquic ta chipam quihi'lbai xk'ormojic cho ribiral queh je' ricab naxhi'lic i Dios naxicohlaj wach ritik'injic taxaj ac'al ch'il i nic' nimal wilic chiwach. ⁴Re' hi'lic xiban i Dios chipam riwuk k'ij je' wili tz'ihmbimaj chirij chipam i Lok' laj Huj wilic wi' riC'uhbal:

“Pa riwuk k'ij naxicohlaj ricamaj i Dios reh ritik'injic chi'nchel xitit'a', re're' xhi'lic wo', nqui i tz'ihmbimaj.

Cu wilic jenaj chic rik'ijil reh oquic chipam rihi'lbai i Dios

⁵Chipam wo' i lok' laj huj re're' nkilow wo' ar chi re' Dios je' wili xik'or chiquij take ma' xinimic ta reh:

“Re' take tinamit wili ma' jaruj ta naquirakam quihi'lbai wuc', nqui xik'or.

⁶Ru'um chi je' re' k'oroj cho eriban chi enkak'or chi nic' pa' wach naxiwih'lic cho c'acharel je' ruc' ma' xquirak ta quihi'lbai ruc' i Dios ru'um chi ma' xquich'ica' ta quic'ux chirij, wilic wo' take c'acharel yu'na je' ruc' ma' ja' quirakam ta quihi'lbai ruc' eh ru'um chi je' re', ⁷re' Dios xipahba' wo' cho jenaj chic rik'ijil reh chi cu ewo' nquirak quihi'lbai take ma' ja' quirakam ta. Chirij riwih'lic jenaj chic rik'ijil i hi'lbai ib nariwih'lic chiwach take k'ij wilcoj wi' yu'na, re' k'atal k'oric ma' Tawiy xk'oric wo' cho chirij re're' nok jarub ta wo' hab k'oroj chic cho queh take kamam kati't ru'um i Dios, xa re' la' xquicowsaj i camna. Ru'um aj re', re' ma' Tawiy xitz'ihmbaj cho i xik'or i Dios chi je' wili:

“Wi re' hat-tak c'ahchi' abiram tak yu'na re' c'ahchi' nik'orom wili, maçowsaj awamna tak chi ribirmijic, nqui xik'or.

⁸Ruc' chi je' re' xik'or ma' Tawiy nkarak chirij chi re' take kamam kati't ma' xquirak ta wo' quihi'lbal ruc' i Dios naxiwih'ic cho chipam yuk'ul wili re' Canahan ribihnal re' xc'amaric wı' quibeh ru'um ma' Joswe. Wi ta nak xquirak quihi'lbal sic'oj cho wach chi queh ru'um i Dios, ma' xk'ormojic ta wo' nak chic ribiral ru'um ma' Tawiy chi cu wilic jenaj chic rik'ijil reh oquic chipam i hi'lbal re're'. ⁹Je' re' ajic re' Dios xipahba' chic cho jenaj rik'ijil re' narirakmajic wı' i hi'lbal re' xa wilic wo' cho chi quina take c'acharel wilqueb chi ritinamıt. ¹⁰Je' re' ajic je' ricab xiban i Dios chi xhi'lic wo' reh ricamaj naxicohlaj ritik'injic wach chi'nchel ru'um chi ma'xta nak chic bih raj tik'injic je' wo' re' take ritinamıt ru' ma' curman ta chic naquikajic quijohtic chi risiquiric i hi'lbal maj xa ruc' wo' chic re're' eriban chi ewo' chi nrakmajic yu'na.

¹¹Je' re' k'uru' ru'um chi kana i hoj ritinamıt i Dios xa cu wilic wo' cho jenaj rik'ijil re' nakarakam wı' kahi'lbal ar ruc' i Dios, kayew wo' tak kac'ux chi cow chi oquic chipam i kahi'lbal re're'. Raj re' c'acharel ma' riyew ta ric'ux, noj riban je' ricab xca'n cho take kamam kati't najtir k'ij chi wilic queh ma' xquich'ica' ta quic'ux chirij i k'oroj cho queh ru'um i Dios eh ru'um re' xchalic i ti'c'axic chi quina. ¹²Je' aj re' chiyohbalej rib i c'acharel re' ma' rinimej ta i k'oric rik'orom cho Dios maj re' wo' k'oric re're' naribanic chi nariye'eric ti'c'axic china. Je' re' nik'or maj je' ricab chi re' Dios nye'bic quic'acharic take tinamıt ruc' rik'orbal, re' aj wo' re' nc'uhunic lok reh chaj bih capew-bal ch'il no'jbal wilic cho pan camna take c'acharel je' ricab nok wi xojyoc'oric ruc' jeno' ch'ihch' c'ultar k'as nah re, eric'uhaj lok nic' wach je' cho pan kati'jolal kabakil. ¹³Ru'um aj wo' re' nik'or aweh tak chi ma' jeno' reh nic' pa' nimal tik'imaj take cho ru'um i Dios eriban chi ta nak eric'ol rib chiwach, chi ta nak ma' erirak chirij i ribanoj on chi ma' ta nak erilow cho ru'. Je' re' nok chi'nchel pa' bih nka'n on nak'or, chi'nchel re're' reht'alim cho i Dios eh chiwach wo' re' nakoic kak'ahsam i kabanaj naponok rik'ijil.

Re' Jesus pahbamaj chi Pet Nahsil aj K'ahsem Si chiwach i Dios

¹⁴Re' hin nik'orom wo' chic aweh tak chi re' Jesus re' rAc'un i Dios xoquic chic chipam ricamaj chi Pet Nahsil C'amol quiBeh take aj k'ahsem si eh chikij i hoj c'ahchi' ribanam i camanic re're'. Je' re' nik'or maj xa re' wo' riponic i Jesus ruc' i Dios, re' nim wach i camanic re're' c'ahchi' ribanam chikij. Ru'um aj re' nik'or aweh tak chi cow kach'ica' tak kac'ux chirij i Jesus.

¹⁵Coric ru', re' Jesus wilic chic yu'na chipam ricamaj chi Nahsil C'amol quiBeh take aj k'ahsem si, xa re' la' tob ta wo' je' re' camanic c'ahchi' ribanam, ma' raj ta rik'orom chi ru'um chi k'e' lok' ricamaj ma' ta nak chic eriquetelej cho kawach i hoj re' ma'xta kansil chi ricuyuric i pajaric nchalic chi kana. Ma'xta, re' Jesus rirak chirij nic' wach nkie'raj i hoj nanchalic i pajaric chi kana maj re're' naxwih'ic ayu' wach ac'al xiquic chipam chi'nchel i pajaric je' ricab nkac'ul i hoj yu'na. Re' cok ru' re're'

ma' jaruj ta xk'ehbic chipam i mahc. ¹⁶Je' re' nok ru'um chi re' Jesus rirak chirij nic' wach nkc'raj i hoj ruc' take pajaric nkac'ul, chiwach i Jesus wili re' wilic rajawric chi K'atal K'oric kojcuhtunok wo' tak chi ch'iclic kac'ux chirij reh chi enkarak i quetelbal keh ch'il wo' i rato'bil chi katobjic chiwach take pajaric nchalic chi kana.

Re' Jesus manlic Pet Nahsil aj K'ahsem Si chiwach i Dios

5 ¹Xa hab wach c'acharel chihoj wach chi Nahsil C'amol quiBeh take aj k'ahsem si chiwach i Dios canamaj chi quitobjic take c'acharel chi rik'ahsjic i quisi chiwach i Dios eh je' wo' chi naquicansam take chicop quic'amaric cok cu'um take c'acharel chi pahkbal cuybal quimahc. Re' c'acharel re' nbanic camanic chi Nahsil aj K'ahsem Si, re' aj wo' Dios xchihbic cho wach chi quixilac take rich c'acharel. ²Ru'um chi re' Nahsil aj K'ahsem Si xa tiwic xa bak wo' ti je' ricab wo' take rich c'acharel chi xa ma' cow ta wo' ti quicapew-bal chiwach ransil i mahc, riquetelej wo' quiwach take c'acharel re' quimahcanic chi ma' c'ahchi' ta quirakam chirij chi mahc c'ahchi'queb. ³Je' wo', re' c'acharel re' riban ricamaj chi Nahsil aj K'ahsem Si nmahcanic wo' eh ru'um aj wo' chi nmahcanic, curman wo' chi reh chi rik'ahsaj johtok risi chiwach i Dios je' ricab wo' riban ruc' quisi take tinamit nanquik'ahsaj reh chi pahkbal cuybal quimahc chiwach i Dios. ⁴Je' wo' chic re', k'e' wo' chic lok' rilok'il i c'acharel re' wilic ricamaj chi Nahsil aj K'ahsem Si chiwach i Dios, xa re' la' ma' hab ta wach jeno' c'acharel eta nak riban chi enoquic chipam i camanic re're' chi xa ta nak chi rutquel rib, re' la' Dios nyuk'unic reh i c'acharel chi nariwih'ic rilok'il ruc' i camanic re're' je' ricab xbanjic cho ruc' i ma' Aron najtir k'ij naxyuk'unjic cho ru'um i Dios.

⁵Nic' pa' wach xc'uluric ruc' ma' Aron je' wo' re' xc'uluric ruc' i Jesus re' Pahbamaj chi K'atal K'oric. Re' cok ru', re' rilok'il wilic i Jesus ruc' ricamaj chi Nahsil C'amol quiBeh take aj K'ahsem Si ma' xa ta ximin ta rib chipam, re' la' kAjaw Dios xcojbic reh chi xic'ul i rilok'il ruc' ricamaj re're'. Re' Jesus k'uru' ma' xa ta xicoj cho rib chipam i camanic chi Nahsil aj K'ahsem Si, re' la' Dios xye'bic cho reh i rinimal wach rilok'il naxik'or reh take k'oric re' ma' hab ta wach aj eh k'oroj cho ru'um i Dios. Re' take k'oric re're', re' tz'ihmbimaj cho chipam i Lok' laj Huj wilic w' i riC'uhbal, je' wili rik'or:

“Re' hin xa wilquin wo' cho chi hin rajaw eh re're' xa wilic wo' cho chi wac'un, nqui.

⁶Je' wo' chic, ar chipam i lok' laj huj re're' je' wili rik'or:

“Re' hat nacahnic chi Nahsil Aj K'ahsem Si chi junelic k'ij sakom eh re' awa'ric nariwih'ic chi Nahsil aj K'ahsem Si naribanam jenaj wach

ch'il riwa'ric xwih'ic cho i Pet Aj K'ahsem Si najtir k'ij re' Melquiserrec, nqui rik'or.

⁷Re' aj re' i k'oroj cho chirij i Jesus re' Pahbamaj chi K'atal K'oric pa rik'ijil cho ric'acharic ayu' wach ac'al. Naxwih'ic ayu' wach ac'al, re're'

q'uih pech wo' xok'ic pa ritij naxiq'uer johtok chi' ruc' ricowil rik'orbil chi ripahkaljic johtok reh Dios i rato'bil. Je' re' xiban maj reht'alim chi re' Dios wilic rajawric chi rico'ljic chi ma' eta nquimic chi junpech. Re' aj take ritij xiban i Jesus, xibiraj wo' cho i Dios eh je' re' xiban ru'um chi re' Jesus xa nbirinic wo' k'oric chiwach.

⁸Je' wo' chic re' Jesus naxwih'ic ayu' wach ac'al, re' Jesus re' Pahbamaj chi K'atal K'oric xic'ul ti'quialal tob ta wo' nchel rAc'un i Dios. Ruc' re're' nki low chi xitijej wo' i no'jbal chirij i birinic k'oric re' nponic chiwach i Dios. ⁹Ru'um nok re' Jesus xitijej birinic k'oric, xye'eric reh chi re' wo' re' enbanic chi re' take c'acharel aj birinel k'oric take, equico'ljic chiwach i junelic quimic eh je' wo' chi enye'eric quic'acharic chi junelic k'ij sakom. ¹⁰Je' re' ajic chi junelic k'ij sakom re' Dios xicana' i Jesus chi manlic chi Nahsil C'amol quiBeh take aj K'ahsem Si eh re' riwa'ric wilic chi aj K'ahsem Si xiban jenaj wach ch'il riwa'ric xwih'ic cho i Pet aj K'ahsem Si najtir k'ij re' Melquiserec.

**Ma' ca'pechjic ta chic raj rik'ormojic take c'uhbal
ma' c'axic ta chi rakmajic chirij**

¹¹Cu wilic wo' nak take k'oric raj rik'ormojic aweh tak chirij ricamaj i kaJaw Jesus chi Nahsil aj K'ahsem Si chiwach i Dios, xa re' la' c'axic so' risakomsjic wach aweh tak ru'um nok cu k'un na'n tak chi rirakmajic chirij take k'oroj lok wili. ¹²Til pa ricorquil, re' hat-tak najtir chic nap'ut tak cho niminic eh xa cu ja' nponic ta wo' wach ano'jbal tak chi hat nak tak chic aj c'uhtunel reh riC'uhbal i Dios yu'na. Re' hat-tak xa cu nawaj wo' nak tak chic chi cu naric'ujtjic wo' chic rica'pech aweh tak take c'uhbal re' xa ma' c'axic ta ti rirakmajic chirij chipam i riC'uhbal i Dios. Ruc' re're', re' hat-tak na'n tak je' ricab i ha'lac'un re' cu ch'uch' riwa'bej ru'um chi ja' cow ta cho pam. ¹³Wi cu je' re' na'n tak, raj rik'orom chi re' hat-tak cu ja' hat ta wo' tak manlic ruc' rirakmajic chirij haj wilic i holohic eh haj wilic i ma' holohic ta, je' ricab nc'uluric ruc' i t'uch ha'lac'un re' cu ch'uch' riwa'bej. ¹⁴Je' re' nik'or maj je' ricab chi re' wi'c re' chic take cuc' sak nimak ac'un ixk'un quic'uxbic reh, je' wo' re' nc'uluric cuc' take aj nimiric re' xa elic wo' nquiyew quic'ux chi narimanlajic wach quino'jbal, xa re' wo' take re' quichol rirakmajic chirij haj wilic i holohic eh haj wilic i ma' holohic ta chi banaric.

6 ¹Ru'um aj re' katik tak ju' ritijljic rij ribiral i Jesus re' Pahbamaj chi K'atal K'oric cu rehtal noj manlajok wach i kano'jbal chi rirakmajic chirij hab wach ru'. Je' re' ka'n tak re' cok ru' ma' kojcahnic tak xa ruc' take c'uhbal re' c'uhtumaj cho keh pan ch'iquinbal cho reh kanimanic on ruc' take pet tijinic xkac'ul naxkapahba' cho kac'ux chirij i Jesus je' ricab take tijinic wili: Re' tijinic nc'uhntunic wi' chi nkajal wach i ma' holohic ta laj no'jbal nka'n, re' tijinic nc'uhntunic wi' chi nkacana' ribanaric take banoj re' quibanic chi ma' eta

kojč'acharic ruc' i Dios chirij chi kojquimic je eh je wo' i tijinic chirij i ch'iquinic c'uxlis chirij i Dios. ²Ma' xa ta re're', je' la' wo' take tocom chic tijinic wili: Re' tijinic chirij take rehreh wach kahsanic ha', re' tijinic nc'uhtunic reh chi curman i cojoj k'abis chi quina take aj niminal chi c'uhtbal queh chi re' Lok' laj Uxlabal wilic cuc', on re' tijinic re' nk'oric chirij quic'a'chic wo' chic take camnak take je, on re' tijinic nc'uhtunic reh nic' wach i ch'ukuj k'oric naribanam i Dios pan cohlsbal wach chi'nchel eh nic' wach nok re' ti'c'axic nariye'eric ruc' i ch'ukuj k'oric nariwih'ic chi junelic chi quina take aj mahc. ³Re' ta nak Dios k'uru' til chiyew win chi enitik ju' ritijljic rij ribiral i Jesus je' ricab cu re' xnik'or je aweh tak. ⁴Re' riwı' chi je' re' raj ribanaric ru'um reh i wili: Re' aj niminal reh Jesus, re're' jenaj c'acharel sakomomaj chic wach i rino'jbal ruc' riC'uhbal i Dios. Je' wo', re' aj niminal suk chic ric'ux chi wilic chic china take cuse'sbal nchalic ruc' i Dios eh ye'oj wo' reh chi enwih'ic i Lok' laj Uxlabal china. ⁵Ma' xa ta re're', re' la' aj niminal til wo' xitijej chic chi re' take nic' pa' nimal take k'oric riban i Dios, til wo' manlic wach. Je' wo' chic, re' riminal wach rajawric i Dios xcamanic chic pa ric'acharic eh re' rajawric i Dios re're', nari'c'uhtunic wo' wach chi manlic chipam i rik'tijil nachiban wı' i ch'ukuj wach k'oric i Dios.

⁶Re' aj niminal reh Jesus k'uru' xye'eric reh chi xiwachej chi'nchel re're', xa re' la' wi xk'ehbic wo' chic pan mahc ruc' rik'ormojic chi ma' re' ta chic aj niminal reh kAjaw Jesus, c'axic chic chi enwih'ic ruc' i no'jbal re' nc'uhtunic lok wı' chi ac' nak chic rino'jbal. Je' re' nik'or maj wi re' aj niminal ma'xta chic ricoj wach i Jesus, re're' je' na nchel c'ahchi' wo' chic ricojom wach curus i rAc'ın i Dios eh c'ahchi' wo' chic ribanam chi encahnıc pan quixbilal i Jesus je' ricab xbanjic reh cu'um i tinamit nok wilic ar wach curus. ⁷Raj nchel wi re' aj niminal ric'ul take ricuse'sbal i Dios eh re' chic haj wilic raj i Dios riban ribanaric, re're' eriban chi enkajalwachej ruc' jeno' ac'al. Je' re' nik'or maj re' ac'al nok wilic ricuse'sbal i Dios china ma' xa ta ritz'ubej i jab re' elic nkajic chiwach je' la' wo' riyew cho take tic mu'ın queh take aj ticol re' nsukbic quic'ux ru'um i tic nelic cho chiwach i cac'al nanquicamanej wach. ⁸Tz'ab ru' wi re' aj niminal ric'ul ricuse'sbal i Dios xa re' la' ma' riban ta ribanaric haj wilic raj i Dios, re're' eriban chi enkajalwachej ruc' i ac'al re' ma'xta ricuse'sbal i Dios china. Je' re' nik'or maj re' ac'al re're' xa quix qui'elic cho chiwach eh cu c'ataric chic raj wach ru'um chi ma'xta chic bih ricamanej.

⁹Hat-tak wich aj niminal re' k'e' ti' tiwic'raj tak, tob ta xnik'or lok ribiral aweh tak chirij i yohbal rirak i aj niminal nok ma' riban ta haj wilic i raj i Dios, re' hin til ch'iclic nic'ux chi re' hat-tak natikim tak ju' ribanaric i holohic laj banoj je' ricab curman chi enka'n chi'nchel i hoj re' xojco'ljic chic ru'um i Jesus. ¹⁰Je' re' nik'or maj re' Dios xa coric wo' wach ric'ux eh chi je' re' rino'jbal, re're' nariyeb aweh tak asi ru'um nok ma' jaruj ta iq'uel pa ric'ux acamaj abanam tak cho on re' c'axoj ib abanam tak cho ruc' quitobjic take lok' laj awich aj niminal tak eh cu yu'na chi k'ij xa cu je' wo' re' c'ahchi'cat tak. ¹¹Ru'um aj re' tob ta ch'iclic

nic'ux chi wilic cho ricuse'sbal chana tak, re' hin cu nwaj chi je' ricab cu yu'na chi k'ij nayew tak ac'ux chi quitobjic take awich aj niminel tak, xa je' ok wo' re' cha'n tak elic k'ij cu rehtal nponic rik'ijil re' nac'ulum tak wı' chi manlic i nic' pa' nimal c'ahchi' awuy'em tak. ¹²Je' re' nik'or reh chi ma' eta tisiqulbic tak ruc' quitobjic take awich aj niminel tak, chatik la' tak ju' ribanaric re're' je' ricab curman chi naka'nam chi'nchel i hoj aj niminel re' nkayew kac'ux chi niminic eh nkacuy ransil take ti'c'axic. Cha'n tak re're' k'uru' ru'um nok re' hoj aj niminel reh Jesus nariye'eric keh chi enkehchaj i nic' pa' nimal rik'orom cho i Dios chi nakac'ulum.

Re' k'oroj cho chirij ma' Awraham

¹³Re' chic yu'na chacoj tak rehtal i ribiral wili: Chipam cho k'ij nok re' Dios xik'or cho ribiral chi naricuse'sam i ma' Awraham, re're' naxiyew rik'orbal chi ribil rib, xiban chi je' re' ru'um nok chirij lok ru' ma'xta chic jeno' bihnal k'e' ta nak nim wach riwa'ric chi eripahba' rik'orbal chiwach ru'. ¹⁴Chi je' aj re', re' Dios je' wili xik'or cho reh ma' Awraham:

“Til coric, re' hin nacat nicuse'sam cu rehtal nariq'uic wo' chic nacuse'sjic nanibanam eh re' aj re' nanibanam reh chi nariwih'ic je riq'uihal awa' awi'sil, nqui Dios reh.

¹⁵Chirij wili ruc' rinimal wach rik'unil i ma' Awraham chi ruyu'njic i riponic wach i k'ij re' naric'ulum wı' take k'oroj cho reh ru'um i Dios, xmanlajic wo' wach ruc' i rasjic i rac'un re' Isahac ribihnal. ¹⁶Je' aj re' k'uru' re' Dios naxiyew rik'orbal ruc' i Awraham chi naricuse'sam ruc' rasjic i rac'un re' Isahac, je' na wa'ric xiban je' ricab nca'n take c'acharel re' take reh chi narinabjic chi til naca'nam wo' ribanaric i chaj bih quik'orbal nquiyew, cu nquiyew quik'orbal chiwach jeno' c'acharel nim wach riwa'ric chi quiwach ru' eh nok quiyeb chic quik'orbal ma'xta chic jeno' c'utaj wilic cu chi eta nak nk'ormojic chi ma' eta chic nbanaric. ¹⁷Je' aj re' xiban i Dios, xiyew rik'orbal chi ribil rib ru'um chi ma'xta chic jeno' nim wach riwa'ric chiwach ru'. Je' re' xiban c'uhtbal reh chi ma' eta chic rijal wach ricapewbal chirij rik'orbal riyeb cho queh take naquehchenic reh coch k'oroj cho ribiral ru'um. ¹⁸Je' re' ajic re' rik'orbal xiyew i Dios ruc' i ma' Awraham til wo' xcahnic chi til pallic rik'ormojic ru'um take quib wili: Pet k'oric, re're' xiyew rik'orbal chi til naribanam i haj wilic xik'or chi naribanam eh ricab k'oric, re're' til xipahba' wo' rik'orbal chi ribil rib chi til je' re' naribanam. Re' aj re' riwı' k'uru' chi re' take k'oric re're' ma' jaruj ta eriban chi equijalmajic wach. Je' re' nik'or maj re' Dios ma' jaruj ta erichuc k'oric chikana eh ru'um chi ma' richuc ta k'oric, re're' nbanic chi wilic ransil kamna i hoj re' c'ahchi' kasiq'uim i kaco'ljic ruc' i Dios. Ruc' re're' enkatik ju' rich'iquinjic kac'ux chirij i nic' pa' nimal k'oroj cahnok ru'um i Dios chi nakac'ulum johtok chi kawach. ¹⁹Re' aj rich'iquinjic kac'ux wili, xa je' na ricab cowil pixlic jeno' ma' laj canowa. Je' re' nik'or maj je' ricab nok re' canowa ma' eta chic nc'uyul'jic je pa riye'ab ru'um nok chi cu pa richamil jok i ha' cutuj jok i ahl laj ch'ihch' npahbanic reh, je' wo' re' i rich'iquinjic kac'ux i hoj ma'xta bih

enc'uyu'sunic keh ru'um chi cow ch'iclic chirij i Jesus. Re're' xk'ahxic wo' chic johtok ar pan taxaj chipam ye'ab re' til nlok'onjic wı̄ wach i Dios je' ricab nok wilic jul'jun queh Nahsil aj K'ahsem Sı̄ jenaj pech pa rihab qui'oquic cok chipam i ye'ab k'oroj chi "K'e' wo' chic Nim riLok'il" re' poyoꝝ wach ruꝝ' nim laj tz'ih. 20Je' wo' re' xiban i Jesus eh ruꝝ' re're' xcahnic chi re' aj re' i pet oconak ar pan taxaj nok ja' hab ta wach jeno' aj niminal oconak ar eh je' ricab riwa'ric xye'eric i Melquiserec ru'um i Dios chi xcahnic chi Nahsil aj K'ahsem Sı̄ chiwach, je' wo' re' riwa'ric xye'eric i Jesus chi naribanam i camanic chi Pet Nahsil C'amol quiBeh take aj k'ahsem sı̄ chi junelic k'ij sakom.

Re' k'oric chirij riwa'ric i Melquiserec

7 1Yu'na nanik'orom take wili chirij ma' Melquiserec: Pet, re' ma' Melquiserec, re' wo' re' xwih'ic chi k'atal k'oric china tinamit Salem ribihnal eh je' wo' chi Pet Nahsil aj K'ahsem Sı̄ chiwach i Dios re' nim wach rajawric china chi'nchel. Chi narirakmajic chirij rinimal wach riwa'ric i Melquiserec ru'um reh take ricamaj re're' ayu' nk'ormojic aweh tak i ribiral wili: Junpech nok re' ma' Awraham soljic riban cho ch'il take risol chi k'ak'anic naxponic quisach cho wach take tocom chic k'atal k'oric ch'il wo' take quisol, re' Melquiserec xelic cho chi ric'uluric ma' Awraham eh xicuse'saj! 2Ma' xa ta ar nilmijic rinimal wach riwa'ric je' la' wo' ruꝝ' i wili: Re' ma' Awraham china lok i nic' pa' q'uihal xiban canar pan k'ak'anic xesaj lok pa reh i rilajeb re' k'oroj chi tojbal rij pa' bih chiwach i Dios eh xik'ahsaj reh!

Ricab, re' chic i ribihnal Melquiserec, je' wili nelic wı̄: "Re' nk'atbic k'oric ruꝝ' coric wach c'uxlis". Wi nkatuna wach rik'ormojic i k'oric re're' ch'il i nelic wı̄ ribihnal i tinamit Salem, re' raj rik'orom "sukquil c'uxlis", raj wo' rik'orom chi re' Melquiserec re're' xiyew wo' risukquil quic'ux take tinamit aj Salem ruꝝ' ricamaj xiban chi quik'atal k'oric.

3Wilic wo' jenaj chic k'oric chirij ribiral i Melquiserec. Chipam i Lok' laj Huj re' tz'ihmbimaj wı̄ riC'uhbal i Dios, ma' xtz'ihmjic ta ribiral hab wach ritut rajaw on hab wach take rimam rati't eh ma' xnabjic ta wo' janc'al xasjic on janc'al xquimic. Ruꝝ' re're' nkilow chi re' ribiral chi aj k'ahsem sı̄ ma' xsahchic ta wach je' ricab wo' nok re' rAc'un i Dios c'ahchi' chi camanic chi Pet Nahsil aj K'ahsem Sı̄ chi junelic k'ij sakom.

4Je' re' k'uru', ruꝝ' chi'nchel i kilom re're' chacoj tak rehtal chi coric nic' nimal riwa'ric wilic i Melquiserec. Je' re' nik'or maj xquilow chic chi re' kamam ma' Awraham re' k'e' wo' chic riwa'ric ye'oj chi quiwach take kamam kati't, xiban chi re' nic' pa' q'uihal xic'am cho pan k'ak'anic, xesaj lok pa reh i rilajeb re' k'oroj cho chi tojbal rij pa' bih chiwach i Dios eh xik'ahsaj reh aj k'ahsem sı̄ re're'. 5Til coric, re' ma' Awraham xiban je' ricab rik'or i tak'anic xye'eric rik'ormojic chipam Lok' laj Huj wilic wı̄ riC'uhbal i Dios chiquij take aj k'ahsem sı̄ chiwach i Dios je' ruꝝ' ra' ri'sil take cho rihrimam Awraham re' ma' Lewih ribihnal. Chaj aj bih rik'or

i tak'anic re're'? Rik'or chi tob ta re' take ritinamit i Dios ch'il take aj k'ahsem si re're' ra' ri'sil wo' take cho ma' Awraham, curman chi queh chi re' jenaj reh rilajeb reh pa' bih nca'n canar naquik'ahsam queh take quich ra' ri'sil cho ma' Israhel, re' pahbamaj take chi aj k'ahsem si. ⁶Til c'olok pan ac'ux tak chi re' Melquiserec, re're' jenaj aj k'ahsem si chiwach i Dios je' ruc' ma' re' ta ra' ri'sil cho ma' Lewih! Tob ta je' re' riwi', re're' xic'ul ruc' ma' Awraham i jenaj reh rilajeb reh pa' bih nbanjic canar. Ruc' aj re're' nc'utunic chi nim wach riwa'ric i Melquiserec eh nc'utunic wo' lok chi je' re' riwi' ruc' i wili: Re' Melquiserec xicuse'saj wo' ma' Awraham re' k'oroj cho reh ru'um i Dios chi naricuse'sjic. ⁷Ruc' re're' nc'utunic chi re' Melquiserec nim riwa'ric wilic ruc' i cuse'senic xiban maj chi'nchel neht'alanic reh chi re' nbanic banoj cuse'senic, k'e' nim wach riwa'ric chiwach nc'ulbic reh cuse'sbal!

⁸Pan ricaj k'oric nik'or i wili: Re' Lok' laj Huj re' wilic wi' riC'uhbal i Dios, rik'or chi re' Melquiserec re' xa je' na cu c'achlic wo' yu'na chi k'ij ru'um nok ma' xsahchic ta wach ribiral chi aj k'ahsem si, raj take ra' ri'sil cho ma' Lewih re' xic'ulbic reh jenaj reh rilajeb reh pa' bih nbanjic canar, ma' je ta re' xc'uluric cuc', xa xiquimic la' wo' take je je' ricab nkac'ul chi kunchelal i hoj c'acharel ayu' wach ac'al.

⁹Jenaj chic k'oric chirij i Melquiserec. Re're' k'e' wo' chic nim riwa'ric chiwach ma' Lewih eh nik'or chi je' re' maj re' take ra' ri'sil cho ma' Lewih re' wilqueb wo' chi aj k'ahsem si chiwach i Dios naxye'eric cho queh i jenaj reh rilajeb reh pa' bih nbanjic canar, je' na wa'ric xquik'ahsaj wo' cho reh ma' Melquiserec i toj re're' nok re' kamam ma' Awraham xiban wo' cho k'ahsanic re're' ruc' chi'nchel pa' bih xiban cho canar pan k'ak'anic. ¹⁰Re' wo' re' eriban chi enk'ormojic maj tob ta nak naxelic cho ma' Melquiserec chi ric'uluric ma' Awraham ja' nasjic ta nak i ma' Lewih, xa wilic wo' nak chic cho rija'quil ma' Lewih ch'il take ra' ri'sil pa riquiqu'uel i ma' Awraham.

Re' Jesus i Pet Nahsil aj K'ahsem Si chi junelic k'ij sakom

¹¹Yu'na chi xkilow chic lok chi re' Melquiserec nim wach riwa'ric chiwach i ma' Lewih, curman k'uru' chi re' naroquic chi Nahsil aj K'ahsem Si chiwach i Dios je' ricab ok riwa'ric cho ma' Melquiserec maj yu'na ma' re' ta chic jeno' queh rija'quil cho ma' Aron nariwih'ic chi Nahsil. Coric ru' nok re' take ra' ri'sil cho ma' Israhel xquic'ul cho C'uhbal Ye'oj reh Moyses xk'ormojic cho queh ra' ri'sil ma' Israhel chi xa re' wach take ra' ri'sil i ma' Aron ch'il take ra' ri'sil wo' cho ma' Lewih nacoquic chi aj k'ahsem si chiwach i Dios xa re' la' ru' ru'um chi ma' xca'n ta chi coric i camanic ye'oj chi quina, ma' xtikiric ta chic ju' quipahbabjic take ra' ri'sil cho ma' Lewih chi aj k'ahsem si take. ¹²Ru'um re're', naxjalmajic wach i no'jbal chi ma' re' ta chic ruc' i ma' Lewih narichalic quija'quil take aj k'ahsem si nye'eric chiwach i Dios, je' wo' xjalmajic i tak'anic wilic chi xa chi ruc' nak ma' Lewih nariwih'ic quija'quil take aj k'ahsanel take si. ¹³Je' re' ajic chi xink'oric chic lok chirij i Jesus chi xa wilic wo'

cho chi Nahsil aj K'ahsem Si chiwach i Dios, re' aj wili nc'uluric wo' ruc' i Jesus: Re're' ma' re' ta ruc' i ma' Lewih elenak cho rija'quil chi aj k'ahsem si, ruc' la' i junch'uk chic chi c'acharel re' ma' janc'al ta elenak cho jeno' aj k'ahsem si chi quixilac. ¹⁴Nik'or chi je' re' nc'uluric maj til wo' eht'alamaj chi re' Jesus ar ruc' ma' Jurah xchalic rija'quil, tob ta nchel chipam i C'uhbal Ye'oj reh Moyses ma' haj ta rik'or chi re' take ra' ri'sil cho ma' Jurah naquicamanic chi aj k'ahsem si chiwach i Dios.

¹⁵Re' chic i tak'anic banoj cho chi xa ruc' i ma' Lewih nariwih'ic quija'quil take aj k'ahsem si, xjalaric chic wach eh nc'utunic lok wach chi manlic ruc' i wili: Wilic jenaj chic Pet Nahsil aj K'ahsem Si chiwach i Dios eh re're', re' aj i Jesus. Re're' ma' je' ta ricab take aj k'ahsem si chalanak quija'quil ruc' ma' Lewih, je' la' ricab i ma' Melquiserrec. ¹⁶Chi je' re' riwi', re're' ma' pahbamaj ta je' ricab rik'or i C'uhbal Ye'oj reh Moyses chi xa ca' qui'sil quib nacoquic chi aj k'ahsem si re' la' re're' xpahbabjic ru'um i Dios chi wilic ruc' rajawric, je' ricab i rajawric xc'a'chsanic wo' chic cho reh naxquimic je. ¹⁷Nik'or chi xpahbabjic ru'um i Dios maj chipam i Lok' laj Huj tz'ihmbimaj wi' riC'uhbal i Dios je' wili k'oroj cho ru'um i Dios chirij i Jesus:

“Re' hat tinipahba' chi Nahsil aj K'ahsem Si chi junelic k'ij sakom eh re' awa'ric naribanam jenaj wach ch'il riwa'ric xwih'ic cho i Pet aj K'ahsem Si najtir k'ij re' Melquiserrec, nqui k'oroj.

¹⁸Chirij chic i tak'anic canamaj cho najtir k'ij chi xa re' take ra' ri'sil cho ma' Lewih naquiwih'ic chi aj k'ahsem si, k'oroj chic cho chi ma'xta chic ric'amaric na ru'um nok ma'xta wo' chic bih naricamanic wi'. Chi je' re' k'uru' ma'xta wo' chic rajawric chi quina take c'acharel. ¹⁹Je' re' nik'or maj ruc' i tak'anic re're' ma' xquinimej ta chi manlic i quicamaj take aj k'ahsem si chiwach i Dios. Ru'um aj re', re' Dios xiban chi chirij chic i Jesus enkach'ica' kac'ux. K'e' wo' chic tare't chi nka'n chi je' re' maj re' wo' kAjaw Jesus xbanic chi xoj-oquic chi aj lok'em chic wach i Dios. ²⁰Re' camanic riban i Jesus chi Nahsil aj K'ahsem Si, til re' Dios xtak'anic reh rik'ormojic naxiyew cho rik'orbal chi til coric chi je' re' naribanam i Jesus. ²¹Ru'um chi je' re' xiban i Dios, re' Jesus ma' je' ta ricab take tocom chic take aj k'ahsem si. Je' re' nik'or maj re' take re' naxipahbabjic pan quicamaj ma' xbanaric ta cuc' je' ricab xbanaric ruc' i kAjaw Jesus chi xye'eric jenaj k'oric chirij. Je' re' xiban i Dios naxpahbabjic i Jesus pa ricamaj. Re're' xiyew rik'orbal chi je' wili:

“Re' hin Ajabes Dios niyew nik'orbal chawij eh ma' eta riban chi enijal wach i nik'orbal wili:

Re' hat chi junelic k'ij sakom nacahnic chi Pet Nahsil aj K'ahsem Si, eh re' awa'ric naribanam jenaj wach ch'il riwa'ric xwih'ic cho i Pet aj K'ahsem Si najtir k'ij re' Melquiserrec, nqui xik'or i Dios.

²²Chi riyeb rik'orbal i Dios chirij i Jesus, re' aj wo' re' i pahbamaj chi xoj elok wach i jenaj chic tik'inic re' k'e' wo' chic tare't chiwach i tik'inic banoj

cho *cuc'* take *kamam* kati't ru'um i Dios. ²³Je' re' ajic *k'e'* wo' chic taret chi re' Jesus wilic yu'na chi Nahsil aj K'ahsem *Si* chiwach i Dios. Nik'or chi je' re' maj ju'jun queh take q'uihal *Pet* aj K'ahsem *Si* wih'inak take cho xa xponic wo' wach rik'ijil chi xiquimic je. Ru'um chi je' re' xquic'ul cho, re' camanic re're' xa xitik cho *rib* richopor^{ic} *na* chi quiwach. ²⁴Raj nchel i Jesus ma' je' ta re' nc'uluric *ruc'*, ma' hab ta wach jeno' enoquic chi rijelow-bal pa ricamaj chi *Pet* Nahsil aj K'ahsem *Si* chiwach i Dios ru'um nok re're' ma' jaruj ta chic nariquimic je xa c'achlic la' wo' chi junelic k'ij sakom. ²⁵Ru'um chi junelic k'ij sakom c'ahchi' chi camanic chiwach i Dios chi aj pahkanel quito'bal take c'acharel, re're' rinimej chi manlic i ricamaj chi aj ye'ol quico'lbal take tinamit yu'na eh je' wo' re' johtok chi junelic k'ij sakom *cuc'* take nic' pa' q'uihal quichalic chiwach i Jesus chi c'ahchi' quich'icab quic'ux chirij ru'.

²⁶Je' re' nok til curman chi keh hoj chi re' kAjaw Jesus xwih'ic chi *Pet* Nahsil C'amol quiBeh take aj K'ahsem *Si* chiwach i Dios. Je' re' nik'or maj xa *ruc'* re're' nc'uhunic take no'jbal wili: Re're' ma' janc'al ta mahcanak cho, ma' janc'al ta rich'uwa'rsam wach ricapew-bal *ruc'* take ma' tob ta laj capew-bal eh ma' xiban ta jenaj wach rino'jbal *kuc'* hoj aj mahc. Je' re' ajic ru'um rino'jbal re're', re' kAjaw Jesus til ric'ul chi xwih'ic chi *Pet* Nahsil aj K'ahsem *Si* chiwach i Dios eh je' wo' ru'um chi re're' k'e' wo' chic rinimal wach rilok'il wilic ar pan taxaj. ²⁷Je' re' ajic re' Jesus ma' je' ta ricab take tocom chic nahsil c'amol quibeh take aj k'ahsem *si*. Nik'or wo' chic chi je' re' maj re' take re' curman chi kalakal xquicansaj cho take chicop chi pahkbal cuybal quimahc chiwach i Dios eh cu re' aj chic ru' chirij chic quimahc i tinamit quicansaj cho take chicop chi *si* chiwach i Dios. Raj chic yu'na chi jelow-bal take chicop quicansajc *elic hab*, re' Jesus xiyew *rib* pan quimic wach *curus* eh yu'na johtok chi junelic, *ruc'* i riquimic re' xa junpech wo' xic'ul, re' wo' re' ncamanic chi cuybal quimahc take tinamit chiwach i Dios. ²⁸Je' wo' chic, re' Jesus ma' je' ta ricab take nahsil c'amol quibeh take aj k'ahsem *si* chiwach i Dios, maj re' take re' ma' xa ta re' chi aj mahc take je' la' wo' reh chi xi'oquic chipam quicamaj chi aj k'ahsem *si* chiwach i Dios, cu re' nchel i C'uhbal Ye'oj reh Moyses xcamanic chi chihbal quiwach. Raj nchel Ac'unbes Jesus, til re' Dios xpahbanic reh eh re' rik'orbali i Dios chi ripahbajic i Jesus xiyew cho nok re' hoj *ra'* ri'sil cho ma' Israhel kac'ulum nak chic cho i C'uhbal Ye'oj reh Moyses. Je' re' ajic chi pahbamaj chic i Jesus, re're' c'ahchi' ribanam ricamaj chi manlic yu'na eh je' wo' chi junelic k'ij sakom.

Re' rehtalil i camanic riban i Jesus ar pan taxaj

8 ¹Re' wili til nwaj chi narirakmajic chirij *ruc'* take k'oric c'ahchi' nik'orom lok aweh tak: Re' hoj aj niminel, re' chic i Jesus wilic chi *Pet* kaNahsil C'amol quiBeh take aj K'ahsem *Si* chiwach i Dios. Re're' ma' xa ta wilic cok chi je' re' ar pan taxaj re' wilic *wi'* i Dios, re' la' re', je' ricab nok nye'eric reh jeno' c'acharel

chi ntz'u^hkic cok pa rⁱsec'aj jeno' k'atal k'oric, xye'eric wo' reh chi xoquic chi aj k'atal k'oric rich'i^l i Dios. ²Chi je' re' riwⁱ take ricamaj, nwaj wo' chi naweht'alim tak chi re' ricamaj chi Pet Nahsil aj K'ahsem Sⁱ chiwach i Dios re' Jesus ma' re' ta chipam i Lok' laj Pat re' nlok'onjic wⁱ wach i Dios c'ahchi' ribanam re' xtik'injic cho najtir k'ij chi xa poyoj rij ruc' nimak tak tz'ih, ar la' c'ahchi' ribanam johtok pan taxaj re' ye'ab tik'imaj ru'um i Dios chi ar enye'eric rilok'il chi coric eh chi ar nrakmajic cu'um take quilok'onic reh. ³Je' wo' chic, nwaj chi naweht'alij tak i wili: Je' ricab nok re' take Nahsil C'amol quiBeh take aj k'ahsem sⁱ quipahbabjic chi rik'ahsjic take sⁱ chiwach i Dios chi pahkbal cuybal mahc, je' wo' re' xc'uluric ruc' i kAjaw Jesus chi xwih'ic wo' risⁱ eh ar wo' chiwach i Dios xik'ahsaj johtok. ⁴Wi ta nak re' Jesus xa ayu' wach ac'al wilic, re're' ma' wo' nak chi aj k'ahsem sⁱ chiwach i Dios encamanic. Je' re' nik'or ru'um nok re' camanic re're' xa queh take ra' ri'sil cho ma' Lewih ye'oj. Je' wo' chic, re' risⁱ i Jesus ma' jenaj ta wach ch'i^l i quisⁱ take aj k'ahsem sⁱ. Je' re' nik'or maj cu yu'na chi k'ij re' take re' xa cu c'ahchi' wo' quik'ahsam chikij hoj ra' ri'sil cho ma' Israhel haj wilic take sⁱ k'oroj chipam i C'uhbal Ye'oj reh Moyses chi nariye'eric chiwach i Dios. ⁵Coric aj ru', re' take c'acharel re're' je' ruc' ra' ri'sil cho ma' Lewih nquinimej i k'oroj chipam i C'uhbal Ye'oj reh Moyses chirij i camanic xca'n, xa re' la' i camanic xca'n ru' xa rehtalil i camanic riban i Jesus ar pan taxaj. Je' re' nik'or maj nok oquic chic reh Moyses chi ritik'injic i ye'ab lok'onbal reh Dios re' xitik'a' cho chi xa poyoj rij ruc' nimak tak tz'ih, re' Dios xik'or reh Moyses chi naritik'ab i pat re're' til jenaj wach ch'i^l re' xc'uh^tjic reh naxwih'ic ar nah yuk' Sinayih Ribihnal.

⁶Je' re' nok, re' ricamaj i Jesus ar pan taxaj chi nahsil aj k'ahsem sⁱ chiwach i Dios, k'e' wo' chic riwa'ric chiwach i camanic xca'n take aj k'ahsem sⁱ ayu' wach ac'al. Je' re' nik'or maj re're' i pahbamaj chi enoj elok wach i tik'inic re' k'e' wo' chic taret chiwach i tik'inic banoj cho cuc' take kamam kati't eh nik'or chi je' re' ru'um nok naxiban i ac' laj tik'inic kuc' i hoj aj niminel, re' take k'oric xik'or cahnok ribiral i Dios chi naribanam kuc' hoj k'e' wo' chic holonquil chiwach take k'oric rik'orom cho ribiral queh take kamam kati't.

Re' tik'inic xiban cho i Dios cuc' take kamam kati't xjahlic wach

⁷Pan pet tik'inic xiban i Dios cuc' take kamam kati't, xwih'ic cho c'axquilal cuc' take tinamit chi rinimjic i tik'inic re're'. Wi ta nak ma' xwih'ic cho c'axquilal, ma' curman ta nak chi re' Dios xiban jenaj chic ricab tik'inic. ⁸Ru'um aj chi re' take tinamit wih'ic quic'axquilal chi ma' xquinimej ta i tik'inic re're', re' Dios xinak take chi je' wili:

“Chi kawach johtok nariponic rik'ijil chi nanibanam jenaj chic tik'inic cuc' take ra' ri'sil cho ma' Jurah je' wo' awuc' hat-tak ra' ri'sil cho ma' Israhel.

⁹Re' tik'inic wili, ma' je' ta ricab i tik'inic xniban cho cuc' take amam awati't tak naxwesaj take cho chipam tinamit Ejipto chi c'amoj cho quibeh je' ricab riban jenaj ajabes chi rich'ihlej chi k'ab i riha'lac'un.

- Re' hin nik'or chi re' jenaj chic tik'inic ma' je' ta ricab i najtir tik'inic maj re' tik'inic banoj cho re're' ma' xnimjic ta wo' cu'um amam awati't tak
- eh ru'um chi je' re' xca'n, re' hin ma' xniyew ta chic nic'ux chi quilmiijic.
- 10 Re' aj wili nik'or chirij i jenaj chic tik'inic re' nanibanam awuc' hat-tak ra' ri'sil cho ma' Israhel nok iq'uinak chic lok take k'ij re' ma' xniyew ta chic wi' nic'ux chi awiliric tak:
- 'Je' ricab nantz'ihmjic chiwach jeno' huj take k'oric nbanjic, re' hin nanibanam chi ar pan awamna tak eh je' wo' pan acapew-bal tak nariwih'ic take nik'orbal.
- Nok nibanam chic chi je' re', cu re' aj ru', re' hat-tak til etiwih'ic tak chi niwach chi hat-tak nitinamit eh re' hin Dios equinwih'ic chi k'atal k'oric chana tak, nqui nik'or.
- 11 Nok wilic chic nic'uhbal pan awamna ch'il wo' pan acapew-bal tak, ma' curman ta chic chi cu hab wach narik'oric aweh tak chi cu natijem tak rij rinabjic niwach,
- maj chi'nchel take wilic chic nic'uhbal pan camna, je' chi nimak wach, je' chi cuc'tak wach quiwa'ric naqueht'alim chic niwach.
- 12 Je' re' nik'or ru'um i wili: Re' hin nanibanam chi nanicyum quimahc take c'acharel
- eh nok nicuyum chic i nic' pa' nimal quimahc ca'nam, ma' jaruj ta chic naric'ulic cho pa nic'ux chi ximahcanic, nqui Dios.
- 13 Je' re' ajic ruc' xik'or i Dios chi naribanam jenaj chic tik'inic, nkarak chirij chi chiwach ru', re' rik'ijil i tik'inic ribanam cho najtir k'ij xiq'uic chic lok. Ru'um aj re' je' ricab nka'n ruc' i kaso' chi ma' nkacoj ta chic chikij nank'eherbic, je' wo' re' naric'ulum i tik'inic re're' xa loqu'il chic ma'xta chic ricamanic keh.

Re' pet pat xtik'injic cho, xa tz'ih ti xpoijic cho wi' rij

- 9** ¹Chipam i pet tik'inic xiban cho Dios cuc' take kamam kati't, xitak'a' rik'ormojic chi nariwih'ic jenaj Lok' laj Pat re' narilok'onjic wi' wach ayu' wach ac'al eh xitak'a' wo' rik'ormojic nic' wach ritik'injic quib naca'nam take c'acharel ruc' rehreh wach lok'onic naribanjic chipam i pat re're'. ²Re' pat wili re' poyoj rij ruc' nimak tak tz'ih, xcojoric take cho tasbal pam. Re' pet tasbal wilic i ye'ab re' "Lok' Riwi'" ribihnal. Ar wilic ye'ab pah'ab-bal take cantela, rich'il i mexa re' ncojmoijic wi' caxlan wi'c je' ruc' k'ahsamaj chi si chiwach i Dios.
- ³Chipam ricab tasbal, ar wilic i ye'ab re' k'oroj chi "K'e' Wo' Chic Nim Rilok'il". ⁴Chipam ye'ab re're', wilic jenaj lok' laj ye'ab c'atbal senza ca'loc'omaj i pam ruc' k'an woric laj ch'ihch' je' ruc' q'uih tz'ak. Je' wo' chic, ar wilic jenaj caxa ca'loc'omaj ruc' i k'an woric laj ch'ihch' re' rehtalil i tik'inic ribanam cho i Dios najtir k'ij. Chipam i caxa re' ca'loc'omaj pam

re're' wilic wo' jenaj chic t'uch x̄ara ca'loc'omaj wo' p̄am chi k'an woric laj ch'ihch' re' ne'olmojic w̄i' i wi'c “Manah” ribihnal re' xye'eric cho queh kam̄am kati't najtir k'ij naxiwih'ic cho pan chik yūk'. Je' wo' wilic wo' ar i ch'imim che' xicoj cho ma' Aron chi ribehbal najtir k'ij eh rehtalil chi ye'oj rajawric ru'um i Dios txoxlonic wo' chic cho i rich'imim re're'. Ma' xa ta re're', ar la' wo' wilic i tz'ilom abaj re' tz'ihmbimaj w̄i' take lajeb chi tak'anic xiyew i Dios reh Moyses. ⁵China i c̄axa re' ca'loc'omaj p̄am chi k'an woric laj ch'ihch', ar tik'imaj take quib riwachbal raj tz'e' w̄ach i Dios, “Queruw̄in” quibihnal, re' ne'utunic w̄i' chi re' Dios wilic cūc' take ra' ri'sil cho ma' Israhel. Re' take quib chi riwachbal aj tz'e' w̄ach re're' nquipoy n̄a r̄uc' quix̄ic' re' c̄axa nquih̄rjic w̄i' quiquiq'uel take chicop re' ye'oj take chi s̄i chiwach i Dios. Chirij i k'oric wili k'e' nak nwaj nitikim ju' i k'oric, xa re' la' yu'na ma' curman ta chi nanixerem wach chi'nchel.

⁶Je' re' nok re' p̄et Lok' laj P̄at re' nlok'onjic w̄i' wach i Dios wilic take cho tasbal p̄am. Ar aj chipam i p̄et tasbal re're' qui'oquic cok take aj k'ahsem s̄i chi'nchel k'ij chi ribanaric quicamaj chi k'ahsanic s̄i chiwach i Dios. ⁷Re' chic pa ricab tasbal, ar xa re' wach i nahsil c'amol quibeh take aj k'ahsem s̄i noquic cok eh xa junpech wo' ti chiwach i h̄ab riban chi je' re' narik'ahsaj i quiquiq'uel take chicop chiwach Dios chi pahkbal cuybal rimahc ru' ch'il wo' i quimahc take rich r̄a' ri'sil cho ma' Israhel. Chi quixilac take mahc xbanjic re're', wilic wo' take xbanjic chi ma' eht'alamaj ta chi mahc c'ahchi' ribanjic. ⁸R̄uc' i k'oroj lok wili chirij i p̄et Lok' laj P̄at re' nlok'onjic w̄i' wach i Dios, re' hoj je' wili nkarak chirij ru'um i Lok' laj rUxlabal i Dios: Chi nok cu wilic cho i p̄et p̄at re're', re' take c'acharel je' r̄uc' ma' re' ta nahsil aj k'ahsem s̄i take chiwach i Dios, ma' ja' ye'oj ta nak k'ab queh chi oquic eh chi quiwih'ic cok ar re' til nwh'ic w̄i' i Lok' laj Dios. ⁹Je' wo' chic, re' k'oroj chirij i p̄et Lok' laj P̄at re' nlok'onjic w̄i' wach i Dios, ncamanic chi c'uhtbal reh chi enkarak chirij re' xc'uluric cho najtir cu yu'na chi k'ij. Re' take wich r̄a' ri'sil cho i ma' Israhel naxquiyew chiwach i Dios take chicop xquicansaj chi s̄i on naxquiyew take tocom chic s̄i chi lok'onbal wach i Dios, re' wili c'uhtunic riban lok: T̄ob ta re' take re' nquicoj wach chi r̄uc' i k'ahsanic s̄i nca'n chi pahkbal cuybal quimahc nquik'or chi ma' re' ta chic aj mahc take, xa re' la' re' riy'e'eric i s̄i re're' ma' xiban ta wo' chi suk xiwih'ic pan camna. ¹⁰Je' re' nik'or maj re' take wich r̄a' ri'sil cho ma' Israhel naxquiyew cho i quisi' ma' xca'n ta nchel chi nimbaleh tak'anic re' rik'or nic' wach nasakbok wach kamna i hoj c'acharel, xquiyew la' cho quisi' xa reh nimbaleh take tak'anic xiyew i Dios chirij ric'axaric quitil'jolar je' ricab wo' naxicana' cahnok rik'ormojic keh hoj r̄a' ri'sil i ma' Israhel haj wilic take wi'c ch'il i ha' nakanimem, on nic' wach ritz'ajmajic kib naka'nam. Coric, chi'nchel re're' xtak'abjic cho chi nakanimem i hoj r̄a' ri'sil cho ma' Israhel re' cok ru' cu rehtal xponic rik'ijil i ac' tik'inic re' k'e' wo' chic tar̄et chiwach i tik'inic xiban cūc' take kam̄am kati't.

Re' riquiq'uēl i Jesus xiban chi xojco'ljic chiwach i ti'c'axic

¹¹Re' take tak'anic banoj cho xjalaric wach nok re' Jesus xichop ricamaj chi *Pet* Nahsil C'amol quiBeh take aj K'ahsem *Sī* chiwach i Dios. Re' cok ru' re' ricamaj re're' xkabaraj chi ar chic chiwach i Dios c'ahchi' ribanam, ar *ruc'* pan taxaj re' nbanjic *wī'* til manlic wach lok'onic eh ma' re' ta nchel ayu' wach ac'al chipam jeno' *pat* re' tik'imaj cu'um take c'acharel. *Ruc'* wo' ricamaj re're', riban wo' cho chi re' take cuse'sbal re' k'oroj cho ribiral chi nariye'eric cho keh hoj aj niminel, wilic chic chi kana yu'na.

¹²Nok re' Jesus xoquic chi Nahsil aj K'ahsem *Sī* ar re' wilic *wī'* i Lok' laj Dios, re're' xa junpech wo' xpah'ic chiwach je' ricab xiban cho Nahsil aj K'ahsem *Sī* chi xa junpech pa rihab xoquic cok chiwach i Dios chi ripahkaljic cuybal mahc. Naxiban cho chi je' re' xic'am cok riquiq'uēl *chīwa* on riquiq'uēl *rac'un* wacax eh xik'ahsaj chiwach. Nic' pa' wach xiban cho aj k'ahsem *sī* re're', je' wo' re' xiban i Jesus xa junpech wo' chi junelic k'ij sakom, xiban i ricamaj chi xojrico'lej chi junpech chiwach i ti'c'axic nariye'eric chi quina take aj mahc. Naxiban cho chi je' re', je' aj wili xiban cho: Re're' xiyew *riḅ* chiwach i Dios chi je' ricab jenaj *sī* naxquimic ar wach *curus* chi xa quic' chic riban riti'jola!

¹³Til coric re' take xquic'am cho quisi chiwach i Dios reh chi equicahnic chi ma' re' ta chic aj mahc take, re' take Nahsil aj K'ahsem *Sī* re' riquiq'uēl *rac'un* i wacax xquicoj on re' riquiq'uēl *chīwa* chi puk'uj wach pan ha' ch'il wo' richajil k'ahxok wacax c'atoj chi *sī* chiwach i Dios eh xiquihraj i quic' re're' chi quina take c'acharel re're' chi c'ahchi' ribanam je' ricab rik'or i C'uhbal Ye'oj reh Moyses. Wi je' aj re' xcamanic queh take c'acharel i riquiq'uēl i chicop nc'ataric chi *sī*, ¹⁴re' ta na chic riquiq'uēl i Jesus re' Pahbamaj chi K'atal K'oric ma' eriban chi ma' eta chic nwh'ic pan kacapew-bal ribanaric jeno' banoj re' enbanic chi enk'ehtic *pam* kabeh chi nakac'acharic chi junelic? On ma' eriban chi ma' ta nak eriyew kajawric chi ribanaric i xa pa' bih camanic ye'oj ru'um i Dios re' aj ye'ol reh c'acharic? Re' riquiq'uēl i kAjaw Jesus til je' re' eriban. Je' re' nik'or maj reh chi je' re' nc'uluric *kuc'* i hoj aj niminel, re' Jesus chi to'bomaj ru'um i Lok' laj Uxlabal xc'acharic chi ma'xta nech' ok rimahc chiwach i Dios eh chi je' re' riwī' ric'acharic, xik'ahsaj wo' *riḅ* pan quimic.

Re' Jesus xcojoric chi nahanel reh i ac' laj tik'inic xiban i Dios

¹⁵Ru'um reh quimic xic'ul cho i Jesus chi ricuyuric kamahc ka'nam cho nok re' *pet* tik'inic cu wilic nak cho rajawric chi kana hoj *ra'* ri'sil cho ma' Israhel, xcojoric i Jesus nahanel reh i ac' laj tik'inic ribanam cho Dios chikij i hoj c'acharel. Re' riwī' chi re' Dios xiyew reh Jesus i camanic re're', re' *raj* chirij chi re' take quic'ulbic reh yuk'unic riban chi naca'nam chi ritinamit narimanlajic wach *cuc'* i k'oric k'oroj cho najtir k'ij chi naquic'acharic chi junelic k'ij sakom.

16 Je' re' riwì' k'uru' chi re' Jesus xquimic reh chi xc'uluric je' ricab nc'uluric ruc' jeno' c'acharel nok ritz'ihmbam chic jeno' huj re' rik'or wì' chi re' nic' pa' nimal pa' bih wilic reh, pa ribihnal chic jeno' c'acharel narik'ahxic naquimok je. Reh aj chi en-nimjic i rik'orbal riyeb, re' c'acharel re're' curman chi nariquimic je eh til cu naric'utunic wo' chi coric chi je' re' xc'uluric, ma' je'? 17 Je' re' nik'or maj re' huj re' rik'or wì' haj wilic take nariye'eric pa ribihnal chic tocom, ma'xta riwa'ric wi cu c'achlic i c'acharel re' xtik'inic reh huj, cu re' la' wilic riwa'ric naquimok je c'acharel re're'. 18 Je' aj wo' re' xc'uluric ruc' i pet tik'inic banoj cho ru'um i Dios nok re' quiquiq'uel take cuc' chicop xcojoric chi rehtalil i chopbal cho na riwa'ric i tik'inic re're'. Re' aj wili ribiral k'uru': 19 Pan pet k'oric, re' Moyses xich'ob cho ribehil chi'nchel take tak'anic ye'oj cho ru'um i Dios chi chopbal quina take tinamit. Chirij chic wili xic'am cho jenaj t'uch k'ab che' isopo ribihnal, xibalej cak mix chirij, ximuh pa riquiq'uel chiwa ch'il riquiq'uel rac'un wacax xilacamaj ruc' ha' eh xiquihraj chi quina take tinamit, je' wo' china i botomaj wach huj re' tz'ihmbimaj wì' take tak'anic ye'oj ru'um i Dios.

20 Chirij chic ru' re' Moyses je' wili xik'or queh:

«Ruc' i quic' wili xichop riwa'ric i tik'inic ribanam chic i Dios awuc' tak eh ritak'ab chic wach awuc' tak chi nanimem tak, nqui xik'or queh.

21 Je' wo' chic nok narip'uhitic nak chic i camanic chipam i pat poyoj rij ruc' nimak tak tz'ih, re' quiquiq'uel take chicop quicansjic xquirhijic wo' chiwach i lok' laj pat re're' eh je' wo' re' chi quina take chi'nchel camanbal xcojoric chipam i lok' laj pat lok'onbal re're'. 22 Je' re' xbanaric nimbaleh i C'uhbal Ye'oj reh Moyses eh nik'or chi je' re' maj re' c'uhbal re're' rik'or chi xa re' wach wi ncojoric i quic', chi'nchel wilic cuybal mahc reh. Coric rik'or ru', xa re' la' til coric wo' chi wilic take ju'jun chic mahc ma' xcuyuric ta ruc' ribanaric re're'.

Xa re' wo' riquimic i Jesus nbanic chi ncuyuric quimahc c'acharel

23 Ru'um chi re' C'uhbal Ye'oj reh Moyses rik'or chi cu ruc' quic' nbanaric i cuyuj mahc wi xbanaric jeno' mahc, curman aj chi re' quiquiq'uel take chicop nquihrijic chi quiwach take camanbal xicamanic chi k'ahsbal si eh wilqueb wo' chi rehtalil take xa pa' bih wilic ar pan taxaj. Re' cok ru', re' quic' re're' ma'xta riban chi re' take c'acharel xiwih'ic pan taxaj, reh la' chi xc'uluric chi je' re' curman chi xcojoric i quic' re' til k'e' wo' chic i riwa'ric. 24 Je' re' nik'or ru'um reh rinimal rilok'il i ye'ab xoquic wì' i Jesus re' Pahbamaj chi K'atal K'oric. Re' ye'ab wili re' wilic wo' wì' i Jesus yu'na chi aj pahkem katobjic chiwach i Dios ar pan taxaj wilic. Re' ye'ab wili ma' je' ta ricab i Lok' laj Pat re' nlok'onjic wì' wach i Dios tik'imaj cho cu'um take kamam kati't, re' la' wo' re' xc'uhitic cho reh i Moyses najtir cho k'ij nic' wach ritik'injic i lok' laj pat re're' naribanam.

25 Chi je' aj re' riwì' i ye'ab re're', re' oquic xiban i Jesus, ma' je' ta ricab i oquic xiban cho i Pet Nahsil C'amol quiBeh take aj K'ahsem Si ar cok

chipam i Lok' laj Pat re' nlok'onjic wi' wach i Dios ayu' wach ac'al. Je' re' nik'or maj re' pet nahsil re're' elic i hab xoquic cho chipam i ye'ab re're' chi rik'ahsjic chiwach i Dios i riquiquel take chicop quik'ahsjic chi si, raj nchel i Jesus xa junpech wo' ti curman chi xoquic cok chiwach i Dios chi ric'uhjtjic rib nok iq'uinak chic pan quimic. ²⁶Wi curman ta nak chi re' i Jesus chi q'uih pech xoquic ar, raj nak rik'orom chi xa re' wo' nak rip'uhitic cho c'acharic ayu' wach ac'al cu rehtal rik'ijil yu'na, curman nak chi re' Jesus q'uih pech nak c'ahchi' ricansjic. Raj i wili keht'alim chi xa re' wo' p'uhitunak riq'uic lok rik'ijil ricux'ic wi' i c'acharic ayu' wach ac'al, re' Jesus xa junpech wo' xc'ulic ayu' wach ac'al eh ruc' riquimic xic'ul naxe'ulic ayu', re're' xiban chi q'uihal keh hoj c'acharel xcuyuric kamahc.

²⁷Je' re' ajic je' wo' ricab nok ye'oj cho chi kana i hoj c'acharel chi xa junpech wo' nakaquimic je chi kaju'junal eh chirij chic ru', re' chic i ch'ukuj k'oric narichalic chi kana, ²⁸je' wo' re' chi xa junpech wo' xik'ahsaj rib i Jesus pan quimic eh je' re' xiban reh chi eriban chi encuyuric kamahc chi'nchel i hoj c'acharel. Je' re' k'uru' re' riwi' wo' chic richalic i Jesus re' Pabhamaj chi K'atal K'oric, ma' re' ta chic chi ric'uluric i quimic chirij ricuyuric kamahc narichalic, naric'ulic la' lok chi ribanaric chi narimanlajic wach i kaco'ljic chi'nchel i hoj re' c'ahchi' kuy'em richalic.

Re' riquiquel chicop ma'xta rajawric chi ricuyuric i mahc

10 ¹Je' ricab jenaj nach xa ncamanic chi c'uhthal reh, chi ar wilic cho jenaj c'acharel xa re' la' i nach re're' ma' re' ta wo' i c'acharel maje'? Nic' pa' wach nc'uluric ruc' i nach je' wo' re' nc'uluric ruc' i C'uhbal Ye'oj reh Moyses. Je' re' nik'or maj re' c'uhbal re're' nariyew rik'ormojic chi naquicansjic take chicop chi cuybal quimahc take c'acharel re' elic nquisic' cuybal quimahc, xa c'ahchi' ric'uhitam chi re' take cuse'sbal re' uyumaj nak cho najtir k'ij chi narichalic chi kana, wilic chic take chi kana yu'na. Je' re' k'uru' ru'um chi re' take tak'anic riban i C'uhbal Ye'oj reh Moyses ma' re' ta wo' re' take cuse'sbal naquiwih'ic chi kana, ma' riban ta chi jeno' c'acharel je' ruc' ric'am na i tak'anic wilic chipam i c'uhbal re're' erirak cuybal rimahc chi manlic. ²Wi ta nak xa ru'um ric'amaric na chi coric haj wilic i tak'amaj chipam i C'uhbal Ye'oj reh Moyses nrakmajic i cuybal mahc chi coric, re' take c'acharel re' nquisic' i cuybal quimahc ruc' riy'e'eric take chicop chi si chiwach i Dios chi lok'onbal wach, nquicana' nak ribanaric re're' ru'um chi cuyuj nak chic quimahc chi manlic eh ma'xta nak chic ti' pan camna chirij i quimahc ca'nam. ³Raj wili ma' je' ta re' nc'uluric, re' la' ricorquilal nc'uluric elic i hab quic'amaric take cho chicop chi naquicansjic chipam i lok' laj nink'ij re' nk'ormojic wi' chi cuyuj chic quimahc take c'acharel, je' wili riwi' nc'uluric: Re' cansanic tak chicop chi ye'bal chi si, xa ncamanic queh c'acharel chi naric'ulic cho pan quic'ux chi aj mahc take eh chi ric'ul wo' nak chi queh chi naquiquimic ru'um quimahc. ⁴Je' re' nik'or chi nc'uluric maj re' quiquiquel take rac'un wacax on take chiwa ma'xta cajawric chi ricuyuric i mahc.

Hoj chic lok' laj ritinamit i Dios xa ru'um riquimic i Jesus

⁵Re' Jesus nok cu pan taxaj pe wilic cho chi naric'ulic asjok ayu' wach ac'al, wilic k'oric xik'or reh rAjaw chirij i rik'ahsjic rib pan quimic naribanam ru'.

Re' aj take k'oric wili xik'or reh rAjaw je' ricab tz'ihmbimaj ru'um i ma' Tawiy:

“Re' hat Lok' laj wAjaw Dios natik'ab wo' niti'jolak je' ricab quitijolak take c'acharel

ru'um chi ma' nye'eric ta risukquil ac'ux nok re' take re' chi pahkbal cuybal quimahc nquik'ahsaj take chicop quicansjic chawach on nquiyew take tocom chic si.

⁶Je' re' ajic ru'um chi ma' xponic ta chic chawach chi re' take c'acharel naquic'amam cho take chicop chi naquicansjic chawach chi pahkbal cuybal quimahc,

⁷re' hin nipahba' wib chawach chi je' wili c'ahchi' nik'orom:

‘Re' hin ayu' wilquin chawach chi ribanaric i haj wilic nawaj i hat chi nanibanam je' ricab wo' i tz'ihmbimaj cho chiwij chipam i Lok' laj Huj wilic wi' ak'orbale, nqui Jesus.

⁸Ruc' take k'oric xiban i Jesus chi je' re', nkilow chi re' wili i xaj rik'orom: Pet k'oric, naxik'or chi ma' nponic ta chiwach i Dios chi re' take c'acharel nquicansaj take chicop chi pahkbal cuybal quimahc, re' Jesus xaj rik'orom chi re' Dios ma' nponic ta chic chiwach rik'ahsjic take chicop chi si chiwach je' ricab i k'oroj chipam i C'uhbal Ye'oj reh i Moyses. ⁹Je' wo', naxipahba' rib i Jesus chiwach i Dios eh chi xik'or reh ar wilic chiwach chi ribanaric i haj pa' wilic i raj ru', re're' ruc' take k'oric xiban c'ahchi' rik'orom chi ma' c'ahchi' ta chic ric'uluric je' ricab xc'uluric cho pan pet chi cu re' quicansjic take chicop curman chi xbanaric cho chi pahkbal cuybal quimahc take c'acharel, re' la' i Dios chi rijelow-bal chic i quicansjic take chicop, re' chic i Jesus xitik'a' wach chi xcansjic je. ¹⁰Je' re' k'uru' ruc' i xiban i Jesus re' Pahbamaj chi K'atal K'oric chi xic'am na haj wilic xaj i Dios, re're' xa junpech wo' xiyew rib chi quimic eh xojricoj cok chiwach i Dios chi ritinamit lok' chiwach.

Re' Jesus xye'eric rilok'il chi k'atal k'oric

¹¹Til coric chi kalakal re' aj k'ahsem si noquic chiwach i Dios chi ribanaric ricamaj chi k'ahsanic si eh xa jenaj wach wo' take chicop rik'ahsaj johtok elic i k'ij. Tob ta je' re' riban, re're' ma' jaruj ta xiban chi xcuyuric quimahc take c'acharel chi junpech, ¹²raj ruc' i Jesus ma' je' ta re' xc'uluric, chi cuybal la' reh kamahc xa junpech wo' xiyew rib pan quimic. Chirij chic ructic chi quixilac camnak, xye'eric wo' rilok'il chi k'atal k'oric rich'il i Dios je' ricab nok jeno' c'acharel nye'eric rilok'il chi tz'uklic cok chi richel jeno' k'atal k'oric. ¹³Ma' xa ta re're' xbanaric ruc', ar la' johtok ruc' i Dios yu'na, xa chic re' c'ahchi' ruy'em chi nariponic rik'l'ijil chi nariyeb pa rok take chi'nchel raj ixowonel. ¹⁴Je' re' ajic re' Jesus xa junpech wo' xiyew rib pan quimic eh ruc' re're' xye'eric keh chi junpech chi re' hoj re' wilcoj chic

chiwach i Dios chi ritinamit̄ xcuyuric chi'nchel kamahc chi manlic. ¹⁵Re' k'oric chirij ricuyuric kamahc, xa nok wo' ye'oj cho rehtalil ru'um i Lok' laj rUxlabal i Dios nok je' wili xtz'ihmjic cho ru'um jenaj raj k'orq̄l i Dios:

¹⁶“Hat-tak ra' ri'sil cho ma' Israhel, je' wili rik'or i Ajabes Dios:
‘Chawach tak johtok wilic jenaj k'ij nok re' hin nanibanam awuc' tak jenaj ac' laj tik'inic.

Re' tik'inic re're', re' i wili: Je' ricab nok re' C'uhbal Ye'oj reh Moyses xtz'ihmjic chiwach jenaj huj,
je' wo' re' i hin ar chic pan awamna acapew-bal tak nanibanam chi nariwih'ic take tak'anic niban
reh chi enrakmajic chirij eh reh wo' chi en-nimjic, nqui i Dios, nqui xitz'ihmbaj.

¹⁷Chi rik'orom chic lok re're', re' Dios xik'or wo' i wili:

“Re' hin ma' jaruj ta chic naric'ulic cho pa nic'ux chi hat-tak aj mahc, nqui xik'or.

¹⁸Je' re' ajic wi xa ru'um i Jesus til nkac'ul cuybal kamahc, raj rik'orom chi ma' curman ta chic chi equicansjic take chicop chi sī chiwach i Dios chi pahkbal cuybal mahc.

Re' Jesus aj cojol keh pan sukquil c'uxlis chiwach i Dios

¹⁹Was tak nichak', cu ayu' lok yu'na, re' wili k'oroj lok chirij i Jesus: Pet k'oric, je' ricab nok Pet aj K'ahsem Sī nok ye'oj chic k'ab reh chi oquic cok chipam i ye'ab re' ribihnej “K'e' wo' chic nim rilok'il”, je' wo' re' i Jesus, ruc' i riquiq'uel xichihcaj naxquimic je, xiban wo' chi re' hoj ekoj-oquic ar chipam i ye'ab re' til wilic w̄i' i Lok' laj Dios. ²⁰Re' cok ru' re' tz'ih re' wilic chi tasbal pam ye'ab re' ribihnej “K'e' wo' chic nim rilok'il” ma' re' ta chic i tz'ih re' wilic ar pan ocbal re' wilic w̄i' i Lok' laj Dios. Yu'na re' Jesus xiban chi rehreh chic wach riw̄i' i oquic ar eh re' til riw̄i' je' chic wili: Xa re' wo' nok xik'ahsaj rib̄ pan quimic i Jesus re' c'achlic chi junelic, re' chic re' xoquic chi katobjic chi wilic cocbal ruc'.

²¹Ricab k'oric, re' Jesus k'e' wo' chic rajawric chi quiwach take Pet rich aj K'ahsem Sī eh je' wo' wilic rajawric chi kana i hoj rac'un rixk'un i Dios. ²²Chi keht'alim aj chic i wili chirij i Jesus nipahkaj aweh tak chi kojwih'ok tak chiwach i Dios chi coric wach kac'ux eh je' wo' chi ch'iclic ok kac'ux chi manlic chirij i Dios. Je' wo', je' ricab nc'uluric ruc' i aj k'ahsem sī nanoquic cok chiwach i Dios, pet risakbej rib̄ nariban ritin ruc' sak wach ha', on je' ricab nc'uluric ruc' c'acharel nchalic chiwach i Dios chi pahkbal cuybal rimahc, ric'raj rib̄ chi cuyuj chic rimahc nanquihric i riquiq'uel take chicop cansamaj pa ribihnal, je' wo' re' c'ulurok kuc' i hoj ruc' kawih'ic chiwach i Dios chi ma'xta chic kamahc, kojwih'ok chiwach ruc' sakil wach i kamna. ²³Jenaj chic k'oric nwaj nik'orom. Chirij i rik'ormojic chi c'ahchi' kuy'em chi re' Jesus nacoj rico'lem chi junelic, re' hin nwaj nipahkam aweh tak chi re' take k'oric re're' macana' tak ricojoric wach,

til la' chacowsaj ac'ux tak chirij maj keht'alim chi re' Dios wi rik'orom chi re' Jesus je' re' naribanam, til naribanam chi narimanlajic wach i k'oroj cho re're'.

²⁴Chirij wili, cu wilic wo' chic take pahkanic nwaj nibanam aweh tak. Pet, kasic' tak rij nic' wach ritobjic kib naka'nam chi kibil kib reh chi je' re' enkatijej ric'axaric kib, je' wo' chi ribanaric i holohic laj banoj. ²⁵Je' wo', re' take kamoloj ib chi rilok'onjic wach i Dios ma' nacana' tak ribanaric. Je' re' nik'or maj wilic chic take c'ahchi' quicanab quib, raj i hoj ma' nka'n tak keh je' ricab nca'n ru', kayew la' tak ricowil kac'ux chi kibil kib chi ritikiric ju' kanimanic. Til je' re' raj banaric maj yu'na xa ma' naht ta chic wilic rik'ijil ric'ulic lok i kAjaw.

Re' ricana' rinimjic i Jesus narichalic ti'c'axic china

²⁶Re' hoj keht'alim chic eh kac'ulum wo' chic i coric laj tijinic re' c'uhtumaj keh chirij i Jesus. Wi re' hoj kojmahcanic ruc' kano'jbal chi ma' nkaj ta chic katikim ju' kawih'ic chipam i tijinic re're', ma' wo' re' chic rik'ahsjic rib i Jesus pan quimic chi je' ricab jeno' si enbanic chi encuyuric kamahc. ²⁷Wi ma'xta chic jeno' uyu'nbal chi keh hoj chi encuyuric kamahc, raj rik'orom chi re' chic i wili c'ahchi' kuy'em ruc' yo'jic: Chi re' Dios narich'ukum k'oric china kamahc eh je' ricab nok re' k'ak' yohbal wach nanjohtic ritz'a'quil, je' wo' rijosk'il i Dios yohbal wo' wach najohtok chi kana chi riye'eric i ti'c'axic re' nariwih'ic wo' chi quina take quixowonic wach. ²⁸Reh chi nakarakam chirij i nik'orom chic lok wili, kacoj rehtal nc'uluric ruc' jeno' c'acharel resaj lok rib chi junpech chi rehquen rajawric i C'uhbal Ye'oj reh Moyses. Re' c'uhbal re're' rik'or wi wilic quib on xib ok chi c'acharel nquiyew quichi' chi jeno' c'acharel xmahcanic ruc' resmejic lok rib rehquen i c'uhbal re're', til curman chi naricansjic je chi ma'xta so' quetelbal china. ²⁹Je' re' k'uru' wi jeno' c'acharel naricansjic je, chacapaj wo' tak chirij i naric'uluric wili: K'e' wo' chic rimal i ti'c'axic naric'ulum i c'acharel wi re're' riyak'abej pa rok i tijinic chirij rAc'um i Dios ch'il i Lok' laj Uxlabal ye'oj cho xa ru'um reh ric'axbal i Dios. Je' wo' re' enbanjic ruc' wi re're' ma' riyew ta chic rilok'il re' chaj bih xiban i Jesus chi xojricoj jenaj chi hoj chic ritinamit i Dios eh je' wo' re' wi ma' riyew chic rilok'il riquiquel i Jesus re' chopbal na riwa'ric i ac' laj tik'inic xiban i Dios kuc' i hoj c'acharel. ³⁰Nik'or chi k'e' wo' chic nimal wach i ti'c'axic naric'ulum i c'acharel re're' maj keht'alim wo' chi re' kAjaw Dios je' wili rik'orom cho:

“Wi xa hab wach jeno' xmahcanic, xa re' wach hin til equinye'bic i ti'c'axic china je' ricab til ric'ul queh take aj mahc chi tojbal wach i c'ahbilal nca'n, nqui rik'orom cho.

Je' wo', rik'orom wo' chi je' wili:

“Re' hin kAjaw Dios quinch'ukbic k'oric chi quina take nitinamit, nqui rik'orom cho.

³¹Ru'um aj chi re' Dios k'e' wo' chic rajawric wilic, re' hin nik'or aweh tak chi chiyohbalej rib jeno' c'acharel wi ja' cuyuj rimahc ruc' take ribanoj. Je' re' nik'or maj nawih'ok chiwach i Dios re' c'achlic chi junelic k'ij sakom, til narich'ukuric k'oric china.

Re' no'jbal raj banaric nanchalic i ti'c'axic

³²Wilic wo' take suk laj k'oric raj k'ormojic xa re' la' nwaj chi pet ticapewenok tak chirij ricuyuric ransil take rinimal i ti'c'axic nchalic chana tak nok hat-tak chic oconak pan niminic. Chipam take k'ij re're', ³³ru'um chi wilcat tak chic pan niminic, wilic aweh tak xac'ul tak cho tz'ujuric cu'um take awaj ixowonel tak, on xac'ul tak jeno' tocom chic ti'c'axic. Nok wilic tocom chic awich'il tak c'ahchi' quic'ulum i ti'c'axic je' ricab ac'ulum tak chic cho hat-tak, wilic aweh tak xawichnimej take pan quic'axquilal. ³⁴Nik'or chi je' re' maj nok re' take tocom chic awich'il tak xiponic tz'ahpok cho pan che', wilic aweh tak xatponic tak cho chi quitobjic ru'um chi xaquetelej tak quiwach. Ma' xa ta re're' no'jbal xac'uh taj tak, je' la' wo' naxmak'aric pa' bih wilic aweh tak, re' xbanaric aweh tak re're' xacuy ransil chi suk ac'ux tak. Je' re' xa'n tak ru'um nok aweht'alim tak chi ar pan taxaj nariye'eric aweh tak jenaj bihomal re' yohbal wach rilok'il chiwach take xmak'aric aweh tak ayu' eh re're' ma' jaruj ta c'uhlel wach. ³⁵Je' re' k'uru' ru'um chi wilic jenaj abihomal re' nariye'eric aweh tak ru'um reh abanoj tak, yu'na nipahkaj aweh tak chi macana' tak chi re' c'axquilal eriban chi nkajic acapew-bal tak on chi enyoj ac'ux tak chipam i niminic, ³⁶re' la' curman chi ena'n tak chi enatik tak ju' ricuyuric take ti'c'axic chi cow ac'ux tak reh chi nabanam tak haj wilic raj i kAjaw Dios eh chi je' re' na wo' ac'ulum tak haj wilic i k'oroj cahnok chi nariye'eric aweh tak. ³⁷Je' re' cha'n tak k'uru' maj chipam i Lok' laj Huj re' wilic wi' i C'uhbal Ye'oj reh i Moyses, je' wili tz'ihmbimaj cho chirij i Jesus:

“Xa nic' yu' enc'ulic lok re' c'ulic lok reh,

ma'xta chic richahmic cho, nqui tz'ihmbimaj chipam.

³⁸Je' wo' chiquij take nquicana' chi junpech niminic, je' wili tz'ihmbimaj cahnok:

“Re' take c'acharel wilqueb chi nitinamit

re' xiban chi coric chic wach quic'ux chi niwach,

naquic'acharic chi ch'iclic quic'ux chiwij.

Wi nquicana' wo' chic ninimjic,

re' hin ma' eta nsukbic nic'ux chiquij, nqui tz'ihmbimaj cahnok.

³⁹Je' aj re' tz'ihmbimaj chiquij take nquicana' quinimanic, raj i hoj ma' je' ta kacab take ma' nquitik ta ju' quinimanic. Je' re' nik'or maj re' take re' xa risacharic quiwach ru'um i Dios c'ahchi' quipahkam chi quina ruc' i quino'jbal re're'. Raj nchel i hoj xa ch'iclic wo' kac'ux chirij i kAjaw reh chi re're' ekojrigo'lej chiwach i ti'c'axic narichalic chi quina take aj mahc.

Re' ch'iquinic c'uxlis chirij i Dios

11 ¹Re' rich'iquinjic kac'ux chirij i Dios, raj rik'orom chi re' hoj til keht'alim chi nari'culuric i k'oroj cho ru'um eh tob ta wo' yu'na ma' nkilow ta wach i rimahsjic wach i rik'orom cho re're', re' hoj xa ch'iclic wo' kac'ux chi nari'culuric. ²Re' take cho kamam kati't xquich'ica' wo' cho quic'ux

chirij i Dios chi narimanlajic wach ru'um re' chaj bih rik'orom cho eh ru'um re', re' Dios xk'oric cho chiquij ruc' holohic laj k'oric. ³Re' Dios xk'oric wo' cho reh chi naritik'injic i taxaj rich'il wach ac'al rich'il wo' chi'nchel wilic chiwach. Re' hoj nkacoj wach chi'nchel re're' chi re' Dios xbanic chi xitihkic. Re' xiban re're', re' wo' re' ncamanic keh chi enkarak chirij chi re' chi'nchel nkilow wach yu'na, xtik'injic cho tob ta nak ma'xta bih wilic chi naritik'injic cho.

Re' quibiral take aj najtir k'ij re' xquich'ica' quic'ux chirij i Dios

⁴Re' Awel jenaj queh take aj najtir k'ij xich'ica' ric'ux chirij i Dios. Ru'um chi je' re' xiban re' Dios xik'or cho chi re're' coric wach ric'ux eh xic'ul cho i risi chi c'ahchi' rik'orom chi k'e' wo' chic taret i si re're' chiwach i si xikahsaj i ras, re' Cayin ribihnal. Ru'um rich'iquinjic ric'ux xiban i Awel, cu yu'na chi k'ij tob ta camnak chic, xa cu c'ahchi' wo' katikim ju' ribirmijic chirij i holohic laj rino'jbal xiban ru'.

⁵Re' ma' Henoc jenaj chic c'acharel aj najtir k'ij re' xich'ica' ric'ux chirij i Dios. Chirij ma' Henoc xk'ormojic ru'um i Dios chi k'e' nponic chiwach i c'acharic xiban. Je' re' xk'ormojic chirij maj re' ma' Henoc til xich'ica' ric'ux chirij i Dios eh ru'um re' ma' xquimic ta maj chi c'achlic xc'amaric johtok ru'um i Dios ar pan taxaj. Ruc' xiban i Dios chi je' re' xc'uluric chi naxsiq'uiric cho ma' Henoc ma' hab ta chic wach xrakbic cho reh. ⁶Ruc' aj xc'uluric cuc' quib aj najtir k'ij re're' risakomej wach keh chi re' Dios ma' nwh'ic ta chi suk ric'ux ruc' i c'acharel ma' rich'ica' ta ric'ux chirij. Je' re' nik'or maj reh chi enwh'ic chi suk ric'ux i Dios ruc' i c'acharel nchalic chiwach chi aj lok'em reh, curman chi re' c'acharel re're' ch'iclic ok ric'ux chirij take eht'alamaj chirij i Dios chi je' wili: Chi til re're' til xa wilic wo' eh chi xa riyew wo' quicoch take quicis'bic reh.

⁷Re' ma' Noheh til xich'ica' wo' cho ric'ux chirij i Dios chi re're' riban chi nmanlajic wach i pa' bih k'oroj cho ru'um. Je' re' nok naxk'ormojic reh ru'um i Dios chi wilic take ti'c'axic naric'ulmujic, re're' tob ta ma' ja' nponic ta nak rik'ljil chi narilmijic wach i ti'c'axic xinimej re' xk'ormojic reh eh xiyew ric'ux chi ritik'injic jenaj ma' laj canowa pat re' xcamanic chi co'lbil w' rib ch'il take raj pan pat. Re' rich'iquinjic ric'ux i ma' Noheh chirij i Dios re' aj re' xbanic chi re' Dios xicana' chi xiquimic take c'acharel je' ruc' ma' xquich'ica' ta quic'ux chirij. Ma' xa re' ta re', ru'um la' chi je' re' xiban i ma' Noheh xye'eric reh chi c'och chi re' Dios rik'or chi re're' til coric cho wach ric'ux chiwach.

⁸Je' wo' chic, re' ma' Awraham til wo' xich'ica' ric'ux chirij i Dios. Ru'um aj re' naxk'ormojic reh ru'um i Dios chi narojic c'acharok chipam jenaj ye'ab re' nariye'eric reh chi ric'och, re're' xic'u'lej na ojc eh xelic je chipam ritinamit tob ta ma' reht'alim ta haj c'ahchi' rojic. ⁹Je' wo' ar naxwh'ic chipam i ye'ab k'oroj reh chi nariye'eric reh chi ric'och, re' ma' Awraham til xich'ica' wo' ric'ux chirij i Dios eh ru'um re' xc'acharic ar chi xa iq'u'el ti chipam ye'ab re're'. Je' re' nik'or maj ma' xitik'a' ta jenaj pat re' naricahnic w' chi junpech, xc'acharic

la' chipam i perpat re' tik'imaj chi xa tz'ih rij je' ricab wo' c'acharic xitik ju' ribanaric i rac'un re' Isahac ribihnal. Je' wo' chic, re' ma' Isahac ch'il wo' i ma' Jacow, aj c'ulul wo' take reh i k'orj cho ru'um i Dios chi re' ye'ab nariponic wi' chi c'acharic i ma' Awraham, re' wo' re' nariye'eric queh chi quicoch.

¹⁰Je' re' nok re' ma' Awraham xa pan perpat ti xc'acharic cho eh je' re' xiban maj c'ahchi' ruy'em cho chi ch'iclic ric'ux chirij i Dios chi nok ricohlam chic c'acharic ayu' wach ac'al, narojic c'acharok chipam i ye'ab re' wilqueb wo' wi' riq'uihal tocom chic c'acharel ar pan taxaj re' jenaj ye'ab tik'imaj chi coric ru'um i Dios re' aj capewenel reh chi coric nic' wach ritik'injic i xiban.

¹¹Je' wo' chic, ru'um rich'iquinjic ric'ux i ma' Awraham chirij i Dios re' rehqu'en re' ti' Sara ribihnal, tob ta nak ojonak chic rihabil chi enwih'ic riha'lac'un, xa cu xwih'ic wo' jenaj rac'un. Je' re' ajic, re' ti' Sara xye'eric wo' ricowil chi xasjic riha'lac'un ru'um chi re' ma' Awraham xich'ica' wo' ric'ux chirij i Dios chi re're' eriban chi enmanlajic wach i xik'or reh chi naribanam. ¹²Chi je' aj re', xa ruc' jenaj chi winak re' ma' Awraham ch'il i rehqu'en, xp'uhitic cho re' xc'uluric wili: Xa re' wo' chawil take riq'uihal ch'imil ar pan taxaj on xa re' wo' chawil riq'uihal i sanib chi chi' rinimal ha', re' take riq'uihal rihrimam i ma' Awraham ma' hab ta wach eriban canar cajlajic ru'um chi k'e' q'uihal take. Ma' xa ta wo' xc'uluric re're', til pe' wo' xq'uih'ic wach take ra' ri'sil cho i ma' Awraham xa ruc' ti i jenaj chi rac'un re' xasjic nok johtonak chic rihabil eh xa q'uisin nak chic ma' nponic rik'ijil riquimic.

¹³Chi'nchel take xnik'or lok quibiral wili xic'acharic cho chi ch'iclic quic'ux chirij k'orj cho ribiral queh ru'um i Dios eh cu rehtal quiquimic je, xa xquich'ica' wo' quic'ux chirij i Dios. Coric ru' chi re' take c'acharel re're' ma' xquic'ul ta take cuse'sbal re're' xa pan quicapew-bal la' xquillow je rimanlajic wach, xa re' la' ru' tob ta xa pan quicapew-bal wo' xquillow, quisuksaj wo' je quic'ux chirij rimanlajic wach eh chi je' re' xquiyew wo' quic'ux chi rik'ormojic riwi' i quiwih'ic ayu' wach ac'al chi xa iq'uel take. ¹⁴Re' take chi'nchel wili k'uru' re' xquiyew quic'ux chi rik'ormojic chi je' re' til xquirak chirij chi manlic chi cu wilic jenaj chic ye'ab re' c'ahchi' cuy'em chi naquic'acharic wi' chi junpech. ¹⁵Nik'or aweh tak chi re' ye'ab re're' ma' re' ta ye'ab xilelic cho wi'. Wi ta nak chirij ye'ab re're' c'ahchi' quiyeb quicapew-bal, xiban nak chi xisoljic wo' chic je ar. ¹⁶Xa re' la' ye'ab re're', re' k'e' nak xcaj wi' wih'ic k'e' wo' chic holonquial chiwach xa pa' tinamit wilic ayu' wach ac'al. Til je' re' riwi' maj til ar wilic ruc' i Dios ar pan taxaj. Je' re' nok re' take c'acharel re're' wilic quiy'e'ab ar chipam i xitik'a' i Dios ar pan taxaj chi naquic'acharic ruc'. Je' re' xiban ru'um chi k'e' suk ric'ux nok wilic c'uc' ru'um nok re' take re' ma' xquicana' ta rik'ormojic chi re' aj re' i Dios nquilok'ej wach.

¹⁷Je' re' ajic re' ma' Awraham xich'ica' ric'ux chirij i Dios eh nok ilbal reh wi til coric niminic riban chiwach, re' Dios xipahkaj reh chi re' rac'un re' Isahac ribihnal erik'ahsaj pan quimic chi si chiwach, je' ricab nok jenaj chicop nye'eric chi si chiwach i Dios nk'ahsjic chi naric'ataric. Chirij chic re're', ru'um reh rich'iquinjic ric'ux xiban chirij i Dios, re' ma' Awraham

xik'ahsaj i rac'un chi nariquimic. Je' re' xiban tob ta xa jenaj wo' ti chiwach eh tob ta wo' chirij rac'un re're', ¹⁸re' Dios rik'orom chic cho chi je' wili:

“Chi quixilac ca' qui'sil cho take awac'un,
 xa cuc' take ra' ri'sil cho awac'un Isahac,
 narimanlajic wach i k'oroj aweh wu'um, nqui rik'orom cho.

¹⁹Je' re' k'uru' re' ma' Awraham til xich'ica' ric'ux chirij i Dios naxik'ahsaj rac'un pan quimic. Re're' til xeht'alij pa ricapew-bal chi tob ta nariquimic i rac'un, re' Dios wilic rajawric chi narucsam wo' chic cho chi quixilac camnak. Pa ricorquil, pa ricapew-bal i ma' Awraham re' rac'un re're' ucsumaj nak chic cho chi quixilac take camnak chi cu ma' ja' ta wo' rik'ahsaj chiwach i Dios chi nariquimic eh je' re' nik'or maj pa ricapew-bal i ma' Awraham xa re' wo' naxipahkaj i Dios reh re' rac'un quimic nak chic.

²⁰Re' jenaj chic c'acharel xich'ica' ric'ux chirij i Dios re' i ma' Isahac. Re're' xich'ica' ric'ux chirij chi narichalic i k'ij nok re' tocom chic cuse'sbal narimanlajic wach ruc' ru'um i Dios eh ru'um re' nok q'uisin nak chic ma' nquimic, xipahkaj johtok reh Dios pa ritij chi re' take rac'un, re' Jacow ch'il i Esawuh, quic'ulbok reh take cuse'sbal re're'. ²¹Je' wo' re' Jacow xich'ica' wo' ric'ux chirij i Dios. Re're' nok xa quimic nak chic reh eh tob ta wo' chi xa ma'xta nak chic ransil riti'jolal ribakil, cu xito'bej chic rib china rich'imim chi rilok'onjic wach i Dios eh xipahkaj wo' johtok reh pa ritij chi re' ok wo' take rihrimam re' take rac'un Chep quic'ulbok reh take ricuse'sbal i Dios. ²²Je' wo' re' i Chep til wo' xich'ica' ric'ux chirij i Dios. Nok quimic nak chic reh, xik'or ribiral queh rac'un chi nariponic rik'ijil chi re' take rac'un rixk'un ma' Israhel naquelic cho chipam tinamit Ejipto. Ru'um chi ch'iclic ric'ux chirij i Dios chi nari'uluric chi je' re', xic'uhbalej wo' take cahnok chi naqui'eloc je chipam i tinamit re're' quic'am wo' je riti'jolal ribakil chiquij reh chi naquimuk'ab chipam i ye'ab re' nacojic c'acharok w'i'.

²³Je' wo', chipam take k'ij naxasjic cho i Moyses, re' take ritut rajaw xquich'ica' wo' quic'ux ruc' i Dios chi narico'lem i cac'un. Ru'um aj re' nok re' k'atal k'oric reh tinamit Ejipto xitak'a' quicansjic take chi'nchel cuc' ac'un, re' take re' ma' xquiyohlej ta tak'anic re're', ru'um xquirak chirij chi re' ha'lac'un re're' wilic cho rito'bal i Dios china. Ru'um aj re' naxasjic i cac'un, xib poh xquic'ol chi co'lbal reh. ²⁴Chirij i wili naxwinakbic i Moyses, xich'ica' wo' ric'ux ruc' i Dios chi narimanlajic wach pa' bih k'oroj cho reh. Ru'um aj re' naxponic i k'ij chi naquelic je take ra' ri'sil cho ma' Israhel chipam i tinamit Ejipto, re' Moyses ma' xaj ta chic ric'ulum take rilok'il nye'eric nak reh cu'um take c'acharel ru'um chi queht'alim nak chi rihrimam i k'atal k'oric aj Ejipto. ²⁵Re' la' xponic chiwach, re' i c'acharic re' nari'ulum w'i' i ti'c'axic chi rich'il take chihoj chi ritinamit i Dios. Je' re' xiban maj chiwach i Moyses re' c'acharic naribanam quich'il take c'acharel re're', k'e' wo' chic cho lok' chiwach i c'acharic re' xa junc'am wo' ti riyew risukquil ric'ux i c'acharel ruc'

ribanaric i mahc. ²⁶Je' wo', xiban chi je' re' ru'um chi re' ricapew-bal xa ar wo' xwih'ic ruc' i ricoch naric'ulum ruc' i Dios ru'um reh ric'acharic re' xic'ul wi' i ti'quialal c'axquialal chirij ritinamit i Dios, je' ricab i c'acharic ye'oj chirij i Jesus re' Pahbamaj chi K'atal K'oric. Re' c'acharic re're' xicapaj i Moyses chi k'e' wo' chic cho nim rilok'il chiwach i suk laj c'acharic ruc' bihomal xwih'ic nak reh xa ru'um chi rihrimam i k'atal k'oric reh tinamit Ejipto.

²⁷Je' re' ajic re' Moyses xelic je chipam i tinamit Ejipto eh ru'um chi c'ahchi' rich'icab ric'ux chirij i Dios ma' xiyohlej ta chi re' k'atal k'oric reh tinamit Ejipto yohbal wach naxchalic rijosk'il ru'um relic je chipam ritinamit re're'. Je' wo' chic, wilic jenaj chic riwi' chi re' Moyses xipahba' ric'ux chi ma' xsoljic ta chic chirij eh re' wili riwi' re're'. Chi re're' til c'ahchi' rilom wach i Dios re' ma' nquillow ta wach take junleh chic c'acharel. ²⁸Je' wo' chic, re' Moyses xich'ica' wo' chic ric'ux chirij i Dios naxiban i pet pech rinimjic wach i nink'ij Pascuwa ribihnal. Re're' chi ch'iclic ric'ux chirij i Dios chi naric'uluric i k'oroj reh, xitak'a' ricansjic i jenaj me' eh chirij chic ru' xitak'a' riquihrijic riquiq'uel me' re're' chiwach i ju'jun ritz'ahpil quipat take ra' ri'sil cho ma' Israhel. Je' re' xiban reh chi re' raj tz'e' wach i Dios tak'amaj cho ru'um chi quicansjic take pet cac'un aj Ejipto ma' eta ricansaj jeno' queh take quihalac'un ra' ri'sil cho ma' Israhel je' ruc' wilic china' ritz'ahpil quipat i riquiq'uel take cansamaj me'.

²⁹Je' wo', re' take kich ra' ri'sil cho ma' Israhel xquich'ica' cho quic'ux chirij i Dios naxi'iq'uic chipam rimal ha' re' "Ma' laj Cak Wach Ha'" ribihnal. Ru'um re're', xa ma' c'axic ta iq'uic xca'n je chipam, xa je' na nchel pan chikij laj beh xi'iq'uic je wi'. Raj take aj Ejipto re' xi'oj chi quichoporoc take kich ra' ri'sil cho ma' Israhel, ma' xi'iq'uic ta je chi juntar, jihk'ic la' chic xquic'ul naxok'taj wo' chic cho rib ma' laj ha' re're'.

³⁰Je' wo' chic, re' take kich ra' ri'sil cho ma' Israhel quich'ica' wo' chic quic'ux chirij i Dios naxibehic chirij i tinamit Jericoh ribihnal chiwach wukub k'ij. Ru'um aj chi ch'iclic quic'ux chirij i Dios, xc'uluric chi re' tz'ak nsutunic rij i tinamit re're' xtublujic wach ac'al. ³¹Re' chic ar Jericoh xwih'ic wo' jenaj chic c'acharel re' xich'ica' wo' ric'ux chirij i Dios, Rahaw ribihnal re' c'oyom laj ixok. Ru'um aj chi xich'ica' ric'ux chirij i Dios, re're' xic'ul pan sukquil c'uxlis take aj ju'jun kich ra' ri'sil cho ma' Israhel je' ruc' xiponic cho sutunel ye'ab Jericoh xa pan c'olic.

³²Je' re' k'uru' xa cu q'uih wo' nak take tocom chic c'acharel wilic quik'ormojic chi xquich'ica' quic'ux chirij i Dios, xa re' la' ma' eta nak quinmahnic chi rik'ormojic quibiral take ru'. Ayu' aj wilic quibihnal take c'acharel re're': Re' ma' Jeryon, re' ma' Warac, re' ma' Sanson, re' ma' Jepteh, re' ma' Tawiy, re' ma' Samwel ch'il wo' take rich aj k'orol riC'uhbal i Dios. ³³Re' take xnik'or lok quibihnal wili ch'il wo' take tocom chic c'acharel, xca'n wo' rehreh wach banqj ru'um chi xquich'ica' wo' quic'ux chirij i Dios. Re' aj wili quibiral chirij chaj bih xca'n: Wilic take ma' xquik'eb ta k'ak'anic c'uc' take nimak tak tinamit. Wilic wo'

take xik'atbic cho k'oric chi coric. Wilic wo' take xi'ehtric ric'ulmujiic chaj bih k'oroj cho ribiral queh ru'um i Dios eh wilic wo' take xquitz'ap richi' take cakcoj chi ma' xic'uxuric ta. ³⁴Je' wo' chic, wilic wo' take ma' xic'ahitic ta naxicojoric chipam i k'ak' re' ma' hab ta wach noquic ruc' ritz'a'quialal. Wilic wo' take xico'ljiic chiwach i quimic ruc' k'as laj ch'ihch'. Wilic wo' take xquich'ica' quic'ux chirij i Dios naxquic'raj chi ma' cow ta chic quic'ux. Ru'um reh rich'iquinjic quic'ux xca'n, re' take re' xquic'ul wo' quicowil eh ruc' quicowil re're', xiponic wo' nimak tak aj k'ak'anel re' ma'xta bih xquiyohlej, xca'n la' resmejiic je tocom chic tinamit quichalic chi k'ak'anic pan quitinamit. ³⁵Je' wo' chic, wilic take ixok xquich'ica' quic'ux chirij i Dios eh ru'um re' xquilow wach pan quic'acharic chi re' take quih'alac'un camnak nak chic take je, xic'acharic wo' chic rica'pech. Tob ta wo' wilic take je' re' xquic'ul cho, wilic wo' take c'acharel xiquimic je chi c'ahchi' quic'ulum ti'c'axic. Tob ta xye'eric wo' nak queh chi enquico'lej quib chiwach i ti'c'axic wi xquimay quiniminic, re' take c'acharel re're' ma' xcaj ta chi hab wach xco'lonic queh. Chi je' re' k'uru' xquik'ahsaj quib pan quimic eh re' wili riwi' chi je' re' xca'n: Chi re' take re' queht'alim chi tob ta quiquimok je nariye'eric queh chi nacuctic wo' chic cho chi quixilac take camnak eh nariye'eric wo' queh chi re' quic'acharic k'e' wo' chic holonquialal naribanam nacuctok wo' chic cho. ³⁶Je' wo' chic quich'il take c'acharel xicansjic re're', wilic wo' take xquic'ul nimak tak tz'ujuric, xitz'uhumjiic wo'. Wilic wo' take xitz'aparc pan che' eh ar xibac'aric chi c'aham ch'ihch'. ³⁷Chi quixilac take xicansjic re're', wilic wo' chic take xicansjic chi abaj. Wilic take xicansjic ruc' k'as laj ch'ihch' naxyoc'oric wo' quiyejal. Wilic wo' take xicansjic ruc' c'ul k'as ju' ch'ihch'. Tz'ab ru' chi quixilac take ma' xicansjic ta, wilic take xicahnic chi ma'xta quipat ru'um reh quiniminic eh chi je' re' xca'n xa qui'oj quichalic chic chi ma' xa jenaj ta chic quiy'e'ab. Je' wo', wilic take xicahnic chi ma'xta chic nech' ok quiso' eh xa rij me' chic ch'il i rij chiwa nquicoj chiquij chi jelow-bal quiso'. Ru'um aj reh quiniminic, re' take re' til wo' xca'n chi xa niba' chic take chi junpech, xa ti' chic quic'ux eh xa ixowomaj wo' chic quiwach. ³⁸Je' wo' chic ru'um chi xicahnic chi ma'xta chic quipat, q'uihal queh ar chic pan tak chik yuk' xiwih'ic chi xa behic nca'n, chi xa ar wo' xiwiric pan tak q'uiche' on pan tak pat abaj on rehquen tak uhl. Re' riwi' quic'acharic take c'acharel wili k'e' wo' chic nim wach rilok'il eh chi je' re' riwi' quic'acharic, ma' xic'ul ta chi queh take aj ixowonel chi re' take aj niminal re're' naquic'acharic wo' chic cok chi quixilac.

³⁹Je' re' ajic, re' chic chi'nchel take aj najtir k'ij xnik'or lok ribiral aweh tak k'e' holonquial quibiral rik'or i Dios chiquij ru'um reh rich'iquinjic quic'ux xca'n chirij. Re' cok ru' tob ta je' re' riban, cu ma' jeno' queh quic'ulum take cuse'sbal re' k'oroj cahnok ru'um chi nariyeb cho. ⁴⁰Re' riwi' chi ma' ja' nc'uluric ta re're', re' wili: Chi re' Dios xojricapaj i hoj aj niminal reh Jesus naxitik'a' cho wach chi cu wilic take k'e' wo' chic atob laj cuse'sbal wilic cho chi riye'eric eh ru'um re' namanlajok wach quiy'e'eric, re' take cuse'sbal re're' ma' xa re' ta chic take aj najtir k'ij naquic'uluj reh je' la' wo' i hoj nakac'ulum wo' keh quich'il take ru'.

Re' Dios riyew k'ab chi nkac'ul ti'c'axic chi k'ilbal keh

12 ¹Ar pan taxaj yohbal wach q'uihal take aj niminal je' ruc' xquich'icā quic'ux chirij i Dios c'ahchi' quisutem cho kij chi kilmijic chirij nic' wach rich'iquinjic kac'ux nka'n. Ru'um chi je' re', ka'n tak keh je' ricab riban jeno' aj ajamanel reh chi suk ajamanic naribanam, resaj lok riso' re' n-ahlsanic reh chi ajamanic eh ritik ju' rojic cu rehtal ponok riwach re' nariponic wī'. Je' wo' re' i hoj katik tak ju' kaniminic chi ma'xta cho pan kamma xa pa' jaric nbanic keh chi kojmahcanic eh kojripit chi nakatikim ju' kaniminic.

²Je' wo' chic, je' ricab i aj ajamanel nok xa ar chic wilic je rilbal re' nariponic wī' chi ajamanic, je' wo' re' hoj katik tak ju' riciojoric rehtal chaj bih xiban i Jesus. Re're' xich'icā ric'ux chi manlic chirij i Dios eh je' re' xiban reh chi re' hoj nakac'amam tz'eht reh rino'jbal ru'. Je' wo', tob ta re' Jesus xiq'uc pan q'uixbilal laj quimic je' ricab quimic nquic'ul take c'acharel nim wach quimahc, re're' ma' xyo'jic ta chiwach i q'uixbilal re're', xiyew la' rīb chi quimic chi reht'alim chi cu chiwach johtok wilic je jenaj rimal sukquil c'uxlis nariye'eric reh. Je' wo' chic je' ricab nanye'eric rilok'il jeno' c'acharel chi nantz'uhkic cok pa risec'aj jeno' k'atal k'oric, re' Jesus xye'eric wo' rilok'il chi narik'atam k'oric rich'il i Dios.

³Je' aj re' k'uru' reh chi ma' eta nyoj ac'ux tak eh chi ma' eta wo' nacana' tak rich'iquinjic ac'ux tak chirij i Dios ru'um i ti'c'axic wilcat tak wī', nipahkaj aweh tak chi chayew ac'ux tak chi ricapewjic rij i xiban i Jesus chi je' wili: Re're' xicuy ransil i k'etoj wachis xca'n take c'acharel c'ahbil quino'jbal.

⁴Re' aj wili nipahkaj aweh tak chi chak'ihaj awib tak chiwach i mahc nca'n take c'acharel. Coric, ru'um reh ribanaric i no'jbal re're', re' hat-tak ticahnic tak pan yohbalil chi eticansjic tak cu'um take awich c'acharel, xa re' la' ru' cu yu'na chi k'ij ja' jeno' aweh tak ric'ulum chic quimic re're'.

⁵Chi wilcat tak chipam i ti'c'axic re're' nipahkaj wo' aweh tak chi ma' niq'uc pan ac'ux tak i xik'or cho queh rac'un najtir k'ij i k'atal k'oric ma' Salomon. Re' k'oric re're', re' tz'ihmbimaj cahnok pan Lok' laj Huj wilic wī' i riC'uhbal i Dios re' wo' re' nk'ormojic aweh tak yu'na ru'um i Dios ru'um nok wilcat tak chic chi rac'un rixk'un. Je' aj wili rik'or i tz'ihmbimaj cahnok re're':

“Hat-tak wac'un wixk'un, ma' riban ta chi ma' enayew tak rilok'il i k'iloj riyew aweh tak i Ajabes Dios.

Ma' riban wo' quib ac'ux wi tirik'il chi cow,

⁶maj re're' rik'il wo' take hab wach ti' ric'raj take eh riyew wo' quti'c'axic chi cojbal quino'jbal take ric'ul chi rac'un rixk'un, nqui rik'or i tz'ihmbimaj re're'.

⁷Je' re' nok re' ti'c'axic nchalic chana' tak, chacuy tak ru'um nok ak'ilbal tak nok ye'oj ru'um i Dios. Nok re' Dios riyew k'ab chi nac'ul tak i ti'c'axic, re're' xa c'uhthal chi reh hat-tak chic rac'un rixk'un. Nik'or chi je' re' maj ma' jeno' ac'un ixk'un ma' ta nak ric'ul ti'c'axic chi rik'ilbal ru'um i rajaw.

⁸Raj wi ma' ta nak riyew k'ab i Dios chi nac'ul tak ti'c'axic chi k'ilbal aweh tak, xa c'ahchi' wo' nak ric'ughtam lok chi re' hat-tak ma' re' ta hat-tak manlic rac'ün rixk'ün. Je' re' nik'or maj chi'nchel take rac'ün rixk'ün i Dios ricana' chi nchalic quiti'c'axic chi quik'ilbal. ⁹Ayu' wach ac'al je' wo' re' xkac'ul i hoj nok cu hoj pe nak cuc'tak, nkac'ul nak katz'uhumjic cuc' katut kajaw, maje'? Nok re' take re' kojquitz'uhumej, re' hoj kojbirinic wo' k'oric chi quiwach. Wi je' re' xka'n chi quiwach ru', re' ta na chic chiwach i Dios re' wilic johtok pan taxaj ma' ekobjirinic k'oric chiwach nariyew k'ab chi nchalic i ti'c'axic chi kana? Wi xka'n chi je' re' nakac'acharic wo' chi holohic. ¹⁰Je' re' nik'or maj ruc' i Dios nc'uluric je' ricab nc'uluric cuc' take tutbes ajabes chi nok ja' quiwinakbic ta take quiha'lac'ün cu nquiyew pe chi tz'uhum nanquilow chi curman quitz'uhumjic chi corsbal wach quino'jbal. Je' wo' re' riban i Dios kuc', re're' riyeb cho k'ab chi nchalic ti'c'axic chi kana chi to'bal keh pan kanimanic reh chi re' hoj enka'n je' ricab riwı' ru' chi xa re' i rajmajic wach i holonquilal i raj. ¹¹Coric wo' chi chipam i junc'am nok c'ahchi' kac'ulum i ti'c'axic riban ma' suk ta keh, nti'bic kac'ux xa re' la' nok iq'uinak chic lok i ti'c'axic, re' Dios riban chi kojwih'ic wo' chic pan suk laj c'acharic wi la' xkacana' chi encorsjic wach i kano'jbal.

Re' riwı' c'acharic naca'nam take aj niminel

¹²Re' hin nipahkaj aweh tak chi je' ricab nc'uluric ruc' i c'acharel chi naric'raj chi ma'xta chic ransil riti'jotal ribakil ru'um i k'uhtic re're' ricowsaj riman ric'ux, je' aj wo' re' cha'n hat-tak pan animinic tak.

¹³Nipahkaj wo' aweh tak, chi coric ok wo' wach ano'jbal tak reh chi re' take awich aj niminel tak re' ma' cow ta chic quic'ux chi niminic ma' eta nquicana' quinimanic riman la' chic nquicowej quic'ux chi niminic.

¹⁴Chirij i wili nipahkaj wo' aweh tak chi chayew ac'ux tak chi cow chi nac'acharic tak pan sukquil c'uxlis cuc' take chi'nchel awich c'acharel tak. Re' hin nipahkaj wo' aweh tak chi ma' nwh'ic jeno' mahc pan ac'acharic tak maj wi ma' je' re' ac'acharic tak, ma'xta wo' awih'ic tak chiwach i Dios chi nawilom tak wach.

¹⁵Je' wo' nipahkaj aweh tak chi ma' jeno' ok aweh tak encahnac chi ma' eta ric'ul i rato'bil i Dios. Je' wo' ma' nuctic chaxilac tak jeno' c'acharel c'ahbil rino'jbal re' eriyoj quicapew-bal take awich aj niminel tak je' ricab nc'uluric ruc' i amche' nok q'uihinak chic i ra' riban chi nk'ahic quiti'jotal take c'acharel ru'um i ya'bilal ricoj.

¹⁶Je' wo' chic ma' nwh'ic jeno' aweh tak ericut rib pan yibel wach no'jbal, on ma' ta jeno' aweh tak eriyew pa rok i lok'il riyew reh Dios je' ricab xc'uluric cho najtir k'ij ruc' i Esawuh re' xa ruc' ti junwa' chi c'uxbal xijal wach ruc' richak' i rilok'il wilic chi pet nak ac'unbes chiwach i rajaw. ¹⁷Re' hat-tak aweht'alim tak chic chaj bih xic'ul i Esawuh naxiban chi je' re', maje'? Re're' xaj nak chi re' take cuse'sbal k'oroj cho ru'um i ajabes chi naripahkaljic china ru'um chi pet ac'unbes xa re' la' ru' re' rajaw ma'xta chic bih xiban chi ripahkaljic reh Dios chi eriyew cho take cuse'sbal china, tob ta re' Esawuh xa ok'ic nak chic riban chiwach chi pahkanic.

Re' riwǎ' chi je' re' xiban i rajaw i Esawuh re' chi ma'xta chic bih xaj chi enjahlic wo' chic wach i pahkanic banoj chic lok china i jenaj chic ac'unbes.

Ma' ncahnic ribirmijic i k'oric riban i Dios

¹⁸Re' riwǎ' kawih'ic chiwach i Dios ma' je' ta ricab riwǎ' quiwih'ic cho take kamam kati't ar nah yuk' Sinayih ribihnal nok re' Dios xic'uhtaj rib queh. Ar re' Dios xipahkaj queh chi ma' eta qui'oquic cok cu chiwach i yuk' re're', xa cu naht la' so' xicahnic lok ruc'. Chaj bih xquillow naxiwih'ic cho ar? Re' take re' xquillow chi xa ntenic chic i xak k'ak' china i yuk' re're'. Xquillow wo' chi re' yuk' re're' sutumaj rij ruc' rinimal k'ekom eh je' wo' chi xa ntehlenic chic i jenaj cow laj tew china i yuk' re're'. ¹⁹Je' wo' chic, re' take re' xquibiraj rik'orbali i sub je' wo' xquibiraj rik'orbali i Dios xa re' la' ru' naxquibiraj rik'orbali i Dios, cow xquipahkaj quicuyuric chi narimayam k'oric cuc'. ²⁰Je' re' xca'n ru'um chi ma' nquicuy ta nak chic i yo'jic naxquibiraj take k'oric xiban i Dios chi je' wili:

“Wi hab wach jeno' aweh tak npah'ic chiwach i yuk' chi ma' k'oroj ta reh, naricansjic chi abaj on chi tz'ob-bal. Je' wo' re' enc'uluric ruc' jeno' chicop wi xc'ulic wo' pah'ok ayu', nqui xik'or i Dios.

²¹Ma' xa re' ta take kamam kati't yohbal wach naxiyo'jic ruc' chaj bih xquillow cho, je' la' wo' i Moyses xa nquirquitic chic xik'or chi rinimal laj yo'jic wo' xoquic ruc' ru'.

²²Je' aj re' xc'uluric cho cuc' take aj najtir k'ij re're', raj la' awuc' hat-tak yu'na re' chic i wili xc'uluric: Chipam i katinamit Jerusalem re' wilic chiwach i yuk' Siyon ribihnal, xye'eric keh hoj ra' ri'sil cho ma' Israhel chi nakalok'em wach i Dios c'achlic chi junelic. Je' ricab naxye'eric keh re're', je' wo' re' hat-tak aj nimiral xye'eric wo' aweh tak chi nalok'em tak wach i Dios wilic cho ar pan taxaj, chi hat-tak ihch'ilimaj cu'um take riq'uihal raj tz'e' wach. ²³Ma' xa cu'um ta take re' nawihch'iljic tak, je' la' wo' cu'um take awich aj nimiral tak re' xye'eric chic quilok'il ar pan taxaj je' ricab i lok'il ye'oj reh pet ac'unbes. Re' take aj nimiral re're' xye'eric wo' queh chi ar pan taxaj wilic chic i quibihnal je' ricab ntz'ihmjic ribihnal jeno' c'acharel chiwach jenaj huj. Je' wo' re' hat-tak na'n tak i lok'onc chi hat-tak ihch'ilimaj cu'um take aj nimiral xic'acharic cho chi coric wach quino'jbal eh chirij chi camnak chic je take, ar ruc' i Dios xmanlajic wach chi re' take re' ma' jaruj ta chic naquiquimic. Chiwach aj i Dios re' nk'atbic k'oric chi quina chi'nchel c'acharel ar wilcat hat-tak. ²⁴Je' wo' wilcat tak chiwach i Jesus re' nbanic chi xoj elok wach i ac' tik'inic xiban i Dios chikij chi'nchel i hoj c'acharel. Je' re' xiban i Jesus ruc' riquimic re' ma' je' ta ricab i quimic xic'ul i Awel. Je' re' nik'or maj nk'ormojic chi naxcansjic cho i Awel, re' Dios xaj chi xchalic ti'c'axic china i hab wach xcansanic reh xa re' la' yu'na ruc' riquimic i Jesus re' Dios xaj chi k'e' wo' chic chak'wachquil laj cuse'sbal xchalic chi kana chi'nchel i hoj c'acharel.

²⁵Je' re' nok ru'um chi re' Dios k'e' wo' chic chak'wachquil ricuse'sbal xiyew cho chi kana, chacoj tak rehtal i wili: Maçana' tak ribirmijic rik'orbal. Je' re' nik'or maj wi re' take kamaṃ kati't ma'xta quico'ljic chiwach i ti'c'axic xye'eric chi quina ru'um chi ma'xta chic nquinimej i xik'or i Dios nah yuk' Sinayih, raj rik'orom chi k'e' wo' chic yohballil wilcoj wī wi re' hoj enkacana' rinimjic rik'orbal i Jesus re' wilic chic tok ar pan taxaj. ²⁶Nik'or wo' chi je' re' ru'um i wili: Naxk'oric wo' cho i Dios ar china i yuk' Sinayih, xiban chi re' ricowil rik'orbal xic'uyu'saj pam i yuk' re're', raj yu'na nabanjok wo' i c'uyu'sunic tocom chic riwi' naric'uluric. Je' re' nik'or maj re' Dios xik'or wo' cahnok i wili:

“Junpech chic nanibanam chi re' ac'al naric'uyu'jic wo' chic, re' cok ru' ma' xa re' ta chic i wach ac'al naric'uyu'jic ch'il la' chic i taxaj naric'uyu'jic, nqui xik'or cahnok.

²⁷Re' k'oric wili: “Junpech chic”, raj rik'orom chi re' Dios c'ahchi' riyeb rehtal chi nachiban re're', xa chic re' take tik'imaj chi ma' eta quic'uyu'sjic naquicahnic, raj tik'imaj chi naquic'uyu'sjic ma'xta chic ric'uhtunic quiwach. ²⁸Ru'um aj re' katioxoj johtok reh kAjaw Dios chi re're' xiban chi wilic chi kak'atal k'oric i jenaj re' ma' jaruj ta c'uhlel wach ricamaj. Je' wo' ka'n tak ribanaric take banoj re' nponic chiwach i Dios, kalok'ej tak wach eh kayohbalej wo' tak wach. ²⁹Wilic ok wo' pan ac'ux tak chi re' Dios re' nkalok'ej wach, til riyew ti'c'axic chi quina take aj mahc je' ricab i ti'c'axic ric'am cho i k'ak' re' ric'at chi'nchel xa pa' bih ncojoric cok chipam.

Re' take holohic laj no'jbal raj banaric

13 ¹Chatik tak ju' ric'uhtjic i c'axoj iḃ queh take tocom awich aj niminel tak. ²Je' wo' til maçana' tak ribanaric ato'bil queh take c'acharel re' quichalic chi naht eh ncaj quiye'ab reh quiwarbal. Til nik'or aweh tak chi je' re' maj najtir k'ij wilic take c'acharel naxquiyew quiwarbal take c'acharel ma' xquicoj ta rehtal chi raj tz'e' wach po' i Dios take xquic'ul pan quipāt. ³Je' wo' c'olok pan ac'ux tak quitobjic take c'acharel re' tz'apalqueb take pan che' ru'um reh rik'ormojic ribiral riC'uhbal i kAjaw Jesus. Nic' pa' wach nawaj tak chi ti' etic'rinjic tak je' ricab wi ta nak tz'apalcat tak pan che' quich'il, je' wo' re' ti'quial chawic'raj tak take ru'. Je' wo' re' cha'n tak chi quitobjic take tocom chic c'acharel re' nquic'ul ti'c'axic maj nic' ok pa' chic, re' chic hat-tak eti'quic tak pan jeno' c'axquial re' enye'eric wo' wī chi ti' atil'jolal abakil tak. ⁴Je' wo' chic niban aweh tak i tak'anic wili: Chi'nchel hat-tak re' abanam tak chic caxara, chayew wo' tak rilok'il acaxarahil tak. Maçh'uwa'rsaj wach acaxara tak ru'c' ribanaric c'oyomal. Je' re' tak'anic niban maj nachich'uk k'oric i Dios, naribanam chi narichalic i ti'c'axic chi quina take c'acharel re' nquich'uwa'rej wach i quicaxarahil eh je' wo' chi quina take nca'n i c'oyomal. ⁵Re' chic chirij take bihomal, niban i tak'anic wili chi ma' riban njik'ljitic awamna tak chi ric'axaric wach ru', ch'ihcok la' ac'ux tak

ruç' nic' nimal wilic aweh tak re' riyeb wo' cho aweh tak i Dios. Je' re' pahkanic niban aweh tak maj re' Dios je' wo' wili rik'orom cho:

“Ma' jaruj eriban chi re' hin nacat nicanab chi ma' eta chic tinito'bej tak, ma' wo' chi nacat nicanab chawutquel, nqui rik'orom cho.

⁶Ruç' re're' ewo' riban chi ch'iclic kac'ux enkak'or je' ricab i k'oroj cho ru'um i k'atal k'oric ma' Tawiy naxik'or cho chi je' wili:

“Re' Ajabes Dios re're' aj to'bonel win eh ru'um aj wo' re' xa ma'xta so' bih quinyo'jic wi' ru'um nok ma' eta riban chi jeno' c'acharel npitbic win chi enic'ul ricuse'sbal i Dios, nqui xik'or cho.

⁷Chirij re're', re' chic i wili i tak'anic nwaj niyeb aweh tak chiquij take aj c'amol abeh tak chipam i niminic, re' xicamanic chaxilac tak chi aj c'uhntunel reh riC'uhbal i Dios nok chi cu c'achalqueb nak cho: Naquic'olok cho pan ac'ux tak, chacoj tak rehtal nic' wach i no'jbal xca'n cho ru' eh chatijej wo' tak aweh cuç' chirij nic' wach i niminic xca'n chirij i Jesus re' Pahbamaj chi K'atal K'oric. ⁸Re' take re' je' re' xca'n maj re' riwi' i Jesus re' Pahbamaj chi K'atal K'oric ma' jaruj ta njahlic wach. Re're' xa riwi' wo' cho najtir k'ij, je' wo' re' riwi' chiwach i rik'ijil wilcoj wi' yu'na eh xa je' wo' re' narojic tok wi' chi junelic k'ij sakom.

⁹Je' re' nok ru'um chi je' re' riwi' i Jesus, macana' tak chi enjot'oric acapew-bal tak ruç' take tocom chic tijbal re' ma' xkayew ta aweh chi nabjic. Re' la' hat-tak chayew ac'ux tak chi ricowsjic acapew-bal tak re' cok ru' wilic ok pan awamna tak i c'axoj ib ye'oj ru'um i Dios. Je' re' nik'or maj ma' ruç' ta nchel i tak'anic chirij take c'uxbal raj c'uxuric, on ma' raj ta ric'uxuric naricowjic acapew-bal tak, tob ta wilic take je' re' nquik'or. Raj nchel i hin nik'or aweh tak chi re' take tak'anic re're' xa ma'xta wo' bih ricamanej queh take quic'ambic na. ¹⁰Je' re' nik'or maj re' take cuse'sbal ye'oj ru'um i Dios ru'um reh riquimic i Jesus, xa re' wach i hoj aj niminel reh Jesus koj'ulbic reh eh ma' ye'oj ta queh take ma' ra' ri'sil cho ma' Israhel je' ruç' cu chiwach kak'ijil yu'na nquik'ahsaj jeno' chicop chi si ar chipam i Lok' laj Pat re' nlok'onjic wi' wach i Dios. ¹¹Cuç' take re' nc'uluric je' ricab xc'uluric ruç' i Nahsil C'amol quiBeh take aj k'ahsem si chiwach i Dios chi ma' xye'eric ta k'ab reh chi xic'ux i ritibquial i chicop c'amoj cho chiwach i Dios chi si. Re're' xa re' wach riquiqu'uel i chicop xye'eric k'ab reh chi ric'amaric cok cu chipam ricab k'at reh Lok' laj Pat re' nlok'onjic wi' wach i Dios raj la' riti'ljal i chicop resaj lok cu chirij i lok' laj pat re're' chi ric'ataric lok ar.

¹²Je' re' nok je' ricab chi cu ar lok chirij i lok' laj pat re're' nesmejic lok i riti'ljal i chicop ye'oj chi si, curman wo' cho chi re' Jesus ar lok chirij i tinamit Jerusalen xichihcay i riquiqu'uel naxquimic chi ribanaric chi hoj chic ritinamit i Dios. ¹³Re' hoj k'uru', xa je' ta nak c'ahchi' kelic lok ch'il i Jesus je' ricab naxelic lok chipam i tinamit Jerusalen chi nariquimic lok ar, kihch'ilej ta wo' nak chi tikilcoj chi ricuyuric i ti'c'axic je' ricab xc'uluric ruç' ru' naxic'ul riminal i ti'c'axic. ¹⁴Je' re' nik'or chi naka'nam maj re' hoj keht'alim

chi ma' re' ta ayu' wach ac'al wilic i kaye'ab re' nakawih'ic wi' chi junpech, ar la' pan taxaj i wilic kaye'ab re're' eh ru'um nok chi kawach wilic je rik'ijil chi nakawih'ic tak ar, re' hoj kacoj chic je kacapew-bal chirij i ye'ab re're'.

¹⁵Jenaj chic k'oric enik'or aweh tak wili: Ruc' rito'bal i Jesus chi xa je' ta nak chiwach aj k'ahsem si c'ahchi' kak'ahsam cok i kasi chiwach i Dios, elic kayew tak rinimal rilok'il i Dios. Ruc' take k'oric qu'elic cho pan kachi', kak'or tak ribiral chi re're' i Ajabes china chi'nchel. ¹⁶Je' wo' chic, xa je' ta nak ricab jenaj si c'ahchi' kak'ahsam chiwach i Dios, ka'n tak re' nponic chiwach wili: Xa wilic ok wo' pan kac'ux quitobjic take junleh chic c'acharel re' c'axic ti nca'n pan quic'acharic, on re' naj awato'bil tak.

¹⁷Chirij chic lok i k'oric re're', re' wili jenaj chic tak'anic nwaj wo' nibanam aweh tak: Tibirinok tak k'oric chi quiwach take aj c'amol beh chipam animinic tak eh tiniminok wo' tak chi quiwach. Je' re' cha'n tak maj pan jenaj k'ij re' take re' naquiwih'ic chiwach i Dios re' narilmijic wi' wi xquinimej on ma' xquinimej ta i camanic ye'oj queh. Ru'um aj re' til chac'am tak na i tak'anic niban je aweh tak reh chi je' re' naquicamanic wo' chi suk quic'ux eh ma' re' ta nchel ruc' i riti'quill quic'ux naquicamanic chaxilac tak ru'um nok re' no'jbal chi xa ch'i'c awij tak xa ma'xta bih ericamanej aweh tak.

¹⁸Chi je' re' k'uru' ruc' i tak'anic re're', nipahkaj wo' aweh tak chi chacuy cha'n atij tak chiwij. Re' wili riwi' chi niban je aweh tak i pahkanic re're': Wilic take c'acharel c'ahchi' quicojom nimahc chiwach i Dios ru'um reh c'uhtunic niban, xa re' la' hin ch'iclic nic'ux chi chiwach i Dios xa coric wo' wach c'ahchi'quin eh xa je' wo' re' nwaj nitikim ju' ribanaric. ¹⁹Nacha'n atij tak chikij i hoj, til nipahkaj wo' chic aweh tak i ato'bil chi til cow tipahkanok tak chiwij i hin chi c'ahchi' abanam atij tak chi re' Dios chiyew ta nak cho win chi xa chi jumehk'il equinsoljic wo' chic je' awuc' tak.

Re' ritioxjic johtok i Dios chirij camanic riban chiquij take aj niminel

²⁰Re' chic nwaj nik'orom aweh tak chi re' wili i tij niban chawij tak: «K-Ajaw Dios, re' hat, hat tiye'bic reh sukquill kac'ux. Re' wo' hat xatbanic chi re' kAjaw Jesus re' je' na ricab jeno' aj cha'jem me' nok wilic, xuctic wo' chic cho chi quixilac take camnak. Ruc' re're' xa'n wo' chi ru'um reh riquiq'ucl xichihcay i Jesus naxquimic, re' ac' laj tik'inic xa'n chikij i hoj xcahnic chi pa'lic wach chi junelic k'ij sakom, nqui i tij niban.

Je' wo' chic naniban i tij re're', nipahkaj wo' reh Dios chawij tak ²¹chi re' ta nak i Jesus re' Pahbamaj chi K'atal K'oric to'bonok aweh tak chi ribanaric take banoj quiponic chiwach i Dios eh chi re're' banok chi tikilcat ok tak chi ribanaric take banoj re're'. Chi cohlsbal wach i nitij wili k'uru', nipahkaj chi re' Jesus ye'erok ta nak rinimal rilok'il chi junelic k'ij sakom. Til nipahkaj chi je' ta nak re' c'ulurok.

Re' k'oric cohlsbal wach i huj wili

²²Was tak nichak' aj nimimel, xa ma' q'uih ta wo' ti chi k'oric xnitz'ihmbaj je chipam i huj wili. Ru'um aj re' nipahkaj ato'bil aweh tak chi chacuy wo' tak ti ribirmijic take k'oric k'oroj je chipam. ²³Nwaj wo' chi nana'bem tak chi re' kachak' Timoteyo xelic chic cho pan che' re' tz'aplic nak wı' ru'um reh rinimic. Wi ta nak xa loq'uul ti wilic cho ayu', til wich'il nak ti equinoj awuc' tak chi awiliric tak. ²⁴Jenaj chic k'oric. Chayew tak risukquil quic'ux take c'amol abeh tak ar ch'il wo' take tocom chic aj niminel. Re' take aj niminel xichalic chipam i riyuk'ul Italya nquitak'a' je risukquil ac'ux tak. ²⁵Pan cohlsbal aj wach nik'orbale nipahkaj reh Dios chi re' ta nak re' to'bonok aweh tak chi junelic. Re' aj take wili nik'orbale je awuc' tak.